

東
華
續
錄

東華續錄

同治十九

臣王先謙敬編

臣張式恭恭校

二月丁丑朔左宗棠奏湯溪踞逆窮蹙益甚蔣益澧於城外加掘重濠疊次擊敗金華援賊時復射示城中曉以禍福賊目彭禹蘭遂於正月初九日遣人詣蔣益澧軍前乞降蔣益澧隨令副將劉樹元等約令於初十日將賊目李尙揚等八名誘至濠邊劉樹元等出其不意擒解回營蔣益澧見巨憝就縛乘夜飛飭各營分攻城壘自率親兵於西門策應並商令康國器率閩軍攻南門彭禹蘭見官軍大至遂啟西門徐文秀匹馬衝入劉清亮等繼之該逆無路奔逃併力巷戰約斃賊三千餘名適余朝貴等亦率所部梯城而入又斃賊二千餘名康國器復督閩軍於南門擊之又斃賊

四千餘人城中之賊幾盡其東門壘中之賊見城破火起卽棄壘驚竄被高連陞等分投截殺淨盡當將城壘攻克時已天明蔣益澧飭高連陞等卽率各營乘勝進擊援賊逆首偽戴王黃呈忠等正思逃竄見官軍大隊衝至齊向金華府一帶狂奔官軍乘勢掩殺斃賊二千餘名自酤坊開化村至白龍橋等處賊壘數十座一律焚毀龍游踞逆負嵎已久除夕四更有賊數千出撲東門劉培元飭官軍憑壘轟擊斃賊約數百名侵曉乃遁是後官軍分路攻勦疊有斬擒其難民逃出者日以數十計臣知城賊將遁復令王德榜於城南移築三小壘偪之賊意官軍盡趨東南忽出悍黨千餘撲西路營盤參將余珮玉督兵奮擊斃賊約數百名賊敗入城是夜城中之賊自相鬩鬪人聲鼎沸初十一兩日城賊昇其輜重出屯城外壘中諸營知其必竄詎察益嚴臣復射示城中諭以

湯溪已克李尙揚已擒之故十二日酉刻賊乘月啟東門向湯溪
大路竄赴金華臣先飭劉培元派定水陸馬步分路截擊並飛飭

蔣益澧康國器等整軍以待是時劉培元等各率所部入城將餘
逆勦盡一面整隊跟追斃賊約近萬餘沿途棄械逃散者不計其
數十三日卯刻追近湯溪縣城蔣益澧康國器又邀擊之斃賊數
千高連陞熊建益復派隊邀之逃賊鮮有脫者賊目李學金羅萬
及梁雲摩俱爲高連陞擒獲龍游一城五壘之賊無一漏網至蘭
谿之賊經劉典擊敗後先已分竄浦江城賊無多劉典飭黃少春
等各營會同水師進勦斃賊五六百名卽將縣城克復臣見三城
已復正擬南取永康武義北取浦江爲進擣金華之計適接蔣益
澧函報高連陞熊建益進紮白龍橋賊首黃呈忠等奪路他竄金
華府城踞逆於十二日率黨由東門逸高連陞等乘勢奪門而入

殺賊約二千人立將府城克復查金華府城最得地勢攻取之難
十倍他郡此次乘勝而克實非臣意料所及其李尙揚一犯與賊
首蕭潮潰李侍賢等爲死黨擁眾至十數萬李侍賢赴溧陽倚其
固守金華爲老巢密屬其龍蘭湯三城爲犄角嚴處爲爪牙力抗
大軍情形兇狡臣訊明後卽寸磔之此次三日之內連克府縣四
堅城布政使蔣益澧功績卓著應請旨獎敘其餘尤爲出力文武
員弁懇恩一併獎勵以昭激勸 上諭內閣左宗棠奏攻克湯溪
龍游蘭谿三縣及金華府城一摺金華等處逆賊負隅已久此次
官軍連克四城生擒首逆洵足以寒賊膽而快人心左宗棠調度
有方深堪嘉尙仍著督飭各軍節節進剿盡殲醜類浙江布政使
蔣益澧戰功卓著著賞給小卷江紬袍料一件江紬馬褂料一件
白玉翎管一枝白玉搬指一箇大荷包一對小荷包兩箇並交部

從優議敘○諭左宗棠奏浙江失事應行查辦文武各員訊明分別定擬一摺浙江各府縣或被賊踞或曾經竄擾該地方失事各員均應一律查辦見經該撫訊明已革署杭嘉湖道劉齊昂雖無帶兵專轄之責惟杭城陷後展轉偷生難從未減已革金華府知府王桐於賊匪未至之先業經到任兩月該府城堅固易守如果布置嚴密何至一攻卽陷雖因兵單失守該革員亦會受重傷究屬罪無可逭劉齊昂王桐均著發往新疆充當苦差已革副將余永椿雖無聞警先潰情事惟打仗不力屢次挫退著發往軍臺效力贖罪革職畱任署於潛縣知縣包容該縣本無城郭杭城旣陷勢實難支第責重守土咎無可辭著革任發往軍臺前署安吉縣知縣周冕委署在兩次失守之後又無防兵力難堵禦至據稱失守之時係奉調進省實屬意圖掩飾前署新昌縣知縣楊詩益該

縣本無防兵賊至尙無棄城先走之事前署甯海縣知縣黎定攀於縣城失守實因眾寡不敵所致前署雲和縣知縣柯沅該縣本無城池致被闖入前代理龍游縣知縣衢州府經歷朱毓榮委代在失守之後城中又無官兵駐守失陷情節尙輕惟以上五員均有守土之責豈可稍涉寬縱周冕楊詩益黎定攀柯沅朱毓榮均著革職發往軍臺前署金華府知府徐慮善於失守本案情節最輕惟府印被搶究屬咎有應得著卽革職毋庸畱營效力○諭議政王軍機大臣等崇厚奏嚴防河岸籌辦濠工一摺據奏連日河東賊匪在大營河口尖莊等處乘夜來擾意圖搶渡經隔河開槍轟斃數名賊遂不敢近岸遙見火光向東南冠縣一帶竄去崇厚前赴尖莊親歷河岸查看水淺可涉者多處長濠工程見飭糧臺酌發銀兩興工挑挖並稱沿河紳民樂有此舉卽著崇厚督飭委

員人等安速勸諭催集民夫趕緊挑挖務令濠工一律寬深足資
守禦並不得稽延時日致令賊匪突行衝撲其水深崖斗有險可
守之處均須督令帶領兵勇各員弁嚴密豫防毋稍疏懈至各紳
民等如能將長濠認工捐挖自應覈計工價給與獎敘所請頒發
五六品等職銜部照及國子監照均於本日飭令各該部監照數
頒發矣河東騎賊向東南冠縣一帶竄去河東見在有無餘匪東
省有無兵勇迎頭截擊崇厚前奏查明張錫珠一股回竄館陶等
處僅止馬步二三千人自不難於殄滅著懍遵前旨仍由寶山酌
量帶兵越境追剿與東省兵勇會合卽將此股賊匪悉數殲除並
將追剿及賊蹤所到地方情形偵察明確詳細奏報河西平鄉邱
縣一帶近河處所既有聯莊會良莠不齊卽責令祝壇及副將劉
景芳酌帶兵練前往各處嚴密梭拏如果居民人等能將伏匿匪

徒捆獻亦卽加之獎勵惟不得令不肖員弁藉端騷擾善良是爲至要正在寄諭間譚廷襄奏到捻棍各匪援應長城被擊東竄並張錫珠股匪擾及堂冠派兵剿辦等摺片據稱張錫珠股匪渡河後由堂邑竄往范家厰一帶另有冠縣匪徒孫思邈乘機嘯聚與張錫珠股匪欲由魏家灣一帶偷渡運河東犯譚廷襄所派海羣馬隊及陳顯彝勇隊均已趕到並飛飭總兵保德馳赴堂邑一路兜擊著嚴飭該總兵等會同直隸追剿之軍併力掃蕩寶山趕到卽親督所部與東省兵勇前後夾擊毋稍延玩宋憬詩旣不十分出力其隊日程順書竟至隨賊而去狼子野心勢難歸正崇厚譚廷襄務各懷遵屢次諭旨嚴加防範如果心迹漸形不軌卽當密速妥籌先發制其死命設法殲厥渠魁再行解散餘眾如或辦理不善或不善控馭以致釀成巨患必惟崇厚譚廷襄等是問陳顯

奏聲名甚劣且既經該前撫由淄川撤回何以此次仍令帶兵著查明如不得力仍行撤去不准姑容李城等糾集棍敎各匪欲援長城之賊經譚廷襄咨令德楞額探蹤扼截專辦北路卽以兼顧長城何以德楞額仍駐坊前並不移軍及賊竄至長城黃國瑞之軍腹背受敵德楞額仍敢坐視不相援應殊出情理之外該已革副都統明係挾譚廷襄參奏之嫌並因其不日交卸東撫輒敢屢次故相違拗置地方軍務於不顧意將何居著僧格林沁嚴行查參督令速與東省官軍合力剿賊自效如再不能迅速進兵則是有心延誤惟有卽時軍法從事諒僧格林沁亦不肯爲之姑容也江南海鹽境地毗連著譚廷襄飛咨吳棠派兵堵剿並嚴督同知奎芳與知縣王成謙等各隊將紫荊關竄出之匪兩面夾攻痛加殄除毋令與淄川之賊爲援再與李城等股匪勾合總兵會逢年

督攻淄川辦理如何著卽催督進攻豫防外匪赴援早期肅事敎
匪疊次潛撲泗水及鄒滕等處民寨仍不得以派兵截擊卽行遁
回防範稍疏東昌北路所關尤要該前撫將兗州軍事布置交恩
錫暫行督率擬卽日親帶馬步兵勇馳赴東郡督辦均著隨時具
奏將此由六百里各諭令知之○諭左宗棠奏攻克湯溪等縣並
金華府城生擒首逆耆齡奏克復湯溪等三縣城池各摺片覽奏
曷勝欣慰金華等府縣四城地踞上游最爲扼要且爲大股賊匪
屯聚之所見已同時攻拔賊之精銳亦爲官軍殲盡下游杭紹諸
逆自必聞而喪膽耆齡左宗棠務當乘此破竹之勢會督閩浙諸
軍星夜進擣杭州爲一鼓殲除之計一面分軍規取永康武義以
清後路並嚴飭浙東兵勇速拔紹郡及所屬各縣城以期節節進
剿爲四面合圍杭城之舉毋稍延誤前據朱蘭奏稱包立身謝敬

兩軍可與官軍犄角克復紹郡並保舉餘姚縣生員朱粲等曾經
諭令左宗棠分別籌辦察看包立身所部鄉團是否業已散遣該
團首見在避居何處其領隊之陳紹瑩並餘姚紳士謝敬力戰情
形均著左宗棠按照朱蘭原片所陳詳細查奏將此由六百里各
諭令知之○諭官文等奏遵籌募勇赴晉見無堪以統率之將請
仍俟袁復清等到晉後察看如果得力再令來楚添募多隆阿協
餉仍由楚省按月報解英桂請以募勇之費抵解多隆阿協餉徒
滋輻輳轉恐有誤征楮應請毋庸置議袁復清等成軍後行糧擬
籌撥銀數千兩以資口食卽作鄂省協濟晉餉無須籌還等語湘
勇因南北風氣異宜不願應募赴晉此時將領未得其人卽令勉
強召募亦屬難資得力著照所請毋庸添募俟袁復清等到晉由
英桂察看該二員如果打仗得力再行令攜銀赴楚添募以收實

效多隆阿月餉三萬五千兩仍由楚省按解毋庸抵作募勇經費以免輻輳楚省既籌袁復清等行糧作爲協濟晉餉所以爲鄰省計者已屬周到英桂卽派員迎提令袁復清等赴晉防剿仍隨時察看再行具奏前據英桂奏晉省練勇未經戰陣率多恇怯而奉調吉林黑龍江馬隊暨正定天津兵亦均疲弱且多不守紀律者非嚴加訓練難資得力等語兵丁不守紀律其害甚於無兵亟宜整肅營規勤加訓練以期克當大敵方不至虛糜餉需有名無實各處兵勇到防已非一日英桂與德興阿均有統率之責何以數月之久不行整頓德興阿見在何處駐紮所辦何事著英桂查明具奏該撫務當振刷精神力圖自強之計毋徒恃鄰省援應爲也將此由六百里諭令知之○諭官文等奏迎剿豫捻獲勝楚邊防剿緊要未能分兵馳援豫陝及參贊多隆阿軍務見在無員可派

各摺片豫捻陳大濬前竄隨州經楚軍擊敗回竄豫境此股賊匪屢經敗衄已成強弩之末諒不難剋日殲除惟皖捻西趨沈項誠恐與該逆句合勦辦又形棘手著張之萬毛昶熙迅飭余際昌李續燾等軍併力殲除毋任又行兔脫並一面飭令張曜趙鴻舉等嚴扼皖捻西竄之路以固藩籬楚豫邊境處處毗連官文等以防務緊要未能分兵赴豫自係實在情形卽著該大臣飭令沈俊德楊朝林等軍嚴扼隨州等處要隘儻該逆回竄卽與豫軍會合夾擊毋稍疏虞至張之萬前奏上年十二月二十八日我軍攻克固縣鎮陳逆失其巢穴奔竄隨州此次官文等奏報則稱十二月二十八日豫軍李續燾余際昌進剿失利該逆乘勢南竄隨州等語何以兩處奏報迥不相符難保非帶兵各員捏詞稟飾張之萬率行入告軍情奏報豈容稍涉粉飾著張之萬查明嚴參以儆將

來至陝省漢南軍務喫重疊經諭令官文等飭令梁作楫一軍越境追勦復以興安失守情形萬緊諭令江西布政使李桓馳赴漢南接辦並疊諭嚴樹森卽日出省駐紮秦楚適中之地督率梁作楫等軍克復郡城此次該大臣等尙稱鄂邊喫緊未能越境過征自係尙未接奉寄諭興漢爲川陝楚三邊要隘毛震壽株守洋縣毫不得力李桓到尙需時設被該逆久踞旁出四擾三省邊患伊於胡底著嚴樹森仍遵前旨卽赴秦鄂交界地方扼要駐紮督飭梁作楫歐陽正墉等軍由竹谿一帶掃蕩餘賊剋日馳勦興安收復郡城以副委任毋得株守邊隅藉口兵力不敷致干嚴譴李桓遠在江省卽使剋日抵秦後亦無得力兵勇足資勦辦興漢軍務非楚省力籌兼顧資以兵力萬難藏事且恐日形滋蔓更無了期該大臣等尤當力顧大局毋得以接統有人稍涉推諉至嚴樹森

見在亟須出省自應添募勇丁督率前往以備策應並可兼顧秦
鄂邊防所有山西奏請添募之勇自難兼及卽著照官文等所籌
俟袁復清等抵晉時再由該省備銀至鄂以資招募陝省兵餉卽
著毋庸抵撥本日已諭知英桂照請辦理矣多隆阿軍務參贊需
員官文等以道府大員中實無諳練戎機之員堪膺此選自係爲
慎重軍務起見仍著官文等隨時畱心如有練習兵事宅心公正
大員仍行奏明派往以資臂助將此由六百里各諭令知之○戊
寅諭議政王軍機大臣等崇厚等奏直隸軍務萬分危迫請飭僧
格林沁北來兜勦暨寶山請調提標等兵各摺片前據崇厚等奏
匪蹤撲滅全境肅清當以所奏情節可疑恐俱係屬員一面稟詞
敷衍了事數日之間旋稱河東匪勢燎原情形萬分危迫前後奏
報不符殊堪詫異僧格林沁勦辦皖捻正在喫緊之際豈能抽身

北來崇厚寶山成保膺茲重任均屬責無旁貸且疊次奏調兵勇爲數不少著懷遵前旨飭令派出各員弁激勵兵勇聯絡鄉團嚴密防勦儻敢藉口兵單專待援應並不實力勦辦致令逆匪回竄擾及畿輔恐崇厚等不能當此重咎也寶山前赴館陶勦賊所統遮克敦布兵勇本屬單薄著照所請准其將古北口提督標兵五百名迅調來營以資攻勦所請調熱河駐防兵五百名已諭令瑞麟遵照調撥矣除將此次所奏情形再行寄諭僧格林沁妥籌外仍著崇厚等相度機宜以勦爲防勿得稍涉疏懈遮克敦布隨營員弁內護衛榮俊主事王仲甡均著不准畱營餘均准其畱於寶山軍營以資差委將此由六百里各諭令知之○李鴻章奏十二月二十七日程學啟率兵進攻太倉由西路進行至盤龍鎮遇崑山援賊揮兵接戰副將宋有勝等各帶隊伍往來衝殺斬擒數百

名逆匪敗回崑城我軍卽在蟠龍鎮紮住李鴻章令總兵郭松林率兵由南路進行抵南馬頭該逆憑河築壘以拒我師郭松林督兵開礮斃賊百餘名乘勝渡河斬關直入該逆紛紛敗入城中我軍卽據其壘東北兩門之賊復行出撲李鶴章飛調況文榜等向前堵禦賊卽退回二十八日程學啟率隊扼堵西南援賊來路李鶴章督率各兵攻其南門轟塌城牆數丈我軍渡過浮橋攀城直上城內伏賊千餘死抵缺口槍礮如雨又值浮橋斷後隊不能接應以致仍復退下賊復從西南兩門出撲李鶴章飭周壽昌等迎拒西門之賊郭松林迎拒南門之賊自率親兵小隊扼堵河面添搭浮橋一道奮力接戰該逆敗退入城我軍仍回望仙橋駐紮是夜程學啟復率七營駐赴西門挑戰城賊堅伏不出旋探有大股賊眾萬餘自崑山竄至蓬萊鎮等處欲鈔襲官軍後路正月初

二日郭松林派兵扼紮新造橋自督四營進逼蓬萊鎮之右程學啟派兵攻其左而自督兵由中路直擣蓬萊鎮三路夾擊一鼓而前該逆猝不及防相率潰逃各軍追至青陽港共殺賊三百餘人生擒數十名其派赴福山之常勝軍於十二月二十四日駛抵福山次日渡至河東以江邊大廟爲老營沙划等船均泊廟後賊分三路來撲我兵分投迎敵賊勢不支退入河西老營二十六日黃翼升統淮揚水師及總兵鞠耀乾等各船齊抵福山派隊登岸會合常勝軍分路進剿焚毀賊卡二座圍攻河西賊營該逆憑牆開礮不肯出戰我軍數次攻撲未能得手臣查進圖太倉分剿福山無非爲節節打通救應常昭起見乃太城賊援甚眾各軍未能驟進福山賊壘甚堅孤軍又難深入頃聞逆眾數萬四面圍攻常城月餘不退忠逆李秀城復由蘇州添賊萬餘礮船二百餘隻晝夜

轟擊業將大北門外營盤攻陷西門外兩營亦相繼踏破孤城危
險臣無路能援徒深焦慮復調駐防浦東之道員潘鼎新副將劉

銘傳參將張樹珊等抽帶三千陸軍由海道繞赴福山會合黃翼

升等師船相機進擊臣營兵力本單乃事機所值勢難忽然惟有

竭力籌援以圖進取 上諭太倉爲常昭門戶李鴻章進攻太倉

原爲救應常昭起見而賊援踵至官軍連日進剿雖屢有斬獲竟

不能攻拔堅城且中外兵勇傷亡過多常勝軍已退回松江是太

倉之師攻取尙難得手著李鴻章密飭李鶴章郭松林等堅守營

壘毋爲該逆所乘仍責令程學啟等遏截崑山援賊俾官軍得以

併力太城相機進取常昭城外營盤先後被逆匪攻陷孤城岌岌

可危李鴻章因周興隆等望援甚切調派潘鼎新等陸勇三千附

輪船繞赴福山援剿著卽飛飭黃翼升將移紮鹿苑港之水師星

速前進會同潘鼎新等攻取福山要隘藉通常昭消息以安降將之心黃翼升母得以沙灘無可停泊爲辭稍涉推諉浦東浦西防守最關緊要李鴻章所部業已分赴太倉福山等處後路不免空虛該撫仍當妥籌兼顧俾松滬各營一律穩固方爲妥善將此由六百里諭令知之○諭唐訓方奏提督強占鹽利把持淮河絕皖餉而壞鹺綱勢必釀成巨患一摺據稱李世忠於奏定鹽釐之外私增多卡重累商民並派總兵楊玉珍帶領洋槍隊突出西壩將各棧餉鹽商鹽盡行封銅有運鹽出棧者卽行斬首兇惡萬狀其各營已捆之鹽經過高良澗該卡用纜船截住水口勒捐釐金甚重各營眾氣憤莫遏打開纜船恐難無事該提督於盱眙舊縣私立城池派營防守家產復於五河縣兩岸對立礮臺安置纜船橫截水口不知是何肺腸唐訓方兄令李世忠之族叔李銜華馳赴

滁州勸令改弦易轍尙未知能否聽從等語李世忠貪婪無忌壟斷鹽利不但皖營軍餉被其攘奪而壩商竈丁無所仰食必致盡驅爲盜於全局大有關礙唐訓方前經函致會國藩屬爲寄書開導以冀就我範圍惟李世忠貪黷性成恐未必翻然改悔而一味姑容含忍勢必坐擁厚賞招集亡命釀成巨患收拾更難本日據吳棠奏接准李世忠咨稱僞忠逆糾眾二十萬陸續渡江今已四日上接和含之賊並分股徑向東竄等語是江北軍情益形喫重而李世忠各軍分紮於浦口一帶逼近賊營是其暗中勾結亦不可以不防著會國藩斟酌見在情形妥爲駕馭仍嚴飭李世忠將派赴西壩之洋槍隊卽日撤回所有各棧封錮之鹽悉聽各商販營員自行起運不得恃勢攔阻該提督若能翻然改悔減釐裁卡恪守舊章固屬妥善儻始終驕橫略無忌憚亦不可不加以裁抑

即著該大臣相機妥籌辦理以杜異日尾大不掉之漸將此由六
百里密諭知之○署安徽巡撫唐訓方奏疊奉諭旨查詢各節當
即欽遵分別妥辦茲將辦理情形據實覆陳查黃元吉部勇潰散
所有朱圩各寨賊匪臣遵飭蔣凝學勦辦嗣據該道稟稱因髮逆
北竄經會國藩調防六安見在潁郡存兵僅敷防守勢難勦捻等
情臣復咨請駐紮固始之成大吉一軍分兵進勦旋據會國藩咨
稱巢縣賊眾且悍誠恐蔓延桐城以上成大吉一軍應畱爲雕勦
潛太蕪黃一帶之用礙難撥營進擣朱圩查會國藩來咨均係實
在情形臣已嚴飭太和縣知縣督率紳團加意防守俟騰出兵力
再圖勦洗又查苗練所獲匪首張蘭勦准僧格林沁咨會令臣就
近覈辦見由鳳臺縣知縣蔡鏐錄供詳請覈奪臣查閱該犯供詞
實屬罪大惡極未便久稽顯戮當即札飭蔡鏐將張蘭勦就地正

法並傳首捻圩附近地方以昭炯戒又接會國藩來咨謂苗練近日尙無踞城以叛之迹此際若另行籌兵駐紮壽正二處陽撫陰防使反側者無以自安似不如推誠相待轉可稍省兵力等語臣查會國藩慮事最深所陳情形斷非漫無把握且苗練見攻渦河以北捻圩並將勦辦各情節次稟報臣當卽隨時指示於駕馭之中仍寓鈐束之意應請照會國藩所議目前不必派防較爲穩著又奏臣權篆皖撫兼統臨淮全軍受事以來於一切兵餉戰守事宜罔弗悉心籌畫惟臣部楚軍一分於皖南再分於廬州隨身親旅僅有四營臨淮爲長淮樞紐兵力勢難再分而臨軍如張得勝扼守梁園徐鵠等分防固鎮湖溝蔡光武畱守長淮衛王才秀等移軍蒙城進圖雉河集捻巢備多力分均嫌單薄至於餉項奇絀尤爲棘手兵勇待哺嗷嗷實有朝不保暮之勢見值捻逆窮蹙若

能士飽馬騰可期迅就撲滅撫臣李續宜威望素著實爲苗練所畏且其部下二萬餘人軍餉亦足見在該撫假期已滿合無仰懇天恩飭催星速來臨接莅軍事鎮懾悍紳埽清淮甸在此一舉至李續宜未到以前臣力所能爲仍當竭盡駑駘妥爲籌辦上諭李續宜續請假期刻下已滿計必能星速就道而長途跋涉到皖尙需時日臨淮軍務緊要唐訓方責無旁貸見在巢和各城尙未攻克本日據吳棠奏僞忠逆糾眾二十萬陸續渡江是皖北情形萬分喫重且僧格林沁攻擣捻巢該匪窮蹙紛竄亦意中事臨宿一帶防剿均未可鬆該署撫務當振刷精神於一切戰守事宜妥籌熟計斷不可存五日京兆之見稍涉鬆懈蔣凝學等軍見因防剿髮逆自不暇進擣朱圩仍著督率太和紳團認真防守一俟兵可分撥卽圖進剿苗練近頗恭順據奏毋庸添兵駐守俾釋猜

疑見雖暫從該署撫所請惟苗練陰鷙性成仍當隨時與曾國藩
僧格林沁熟商駕馭鈐束之法不可稍涉大意張蘭勳業經訊明
正法傳首各圩足昭炯戒克蒙額雖無藉詞退避情事該署撫仍
當隨時察看如不得力卽據實嚴參毋稍姑息將此由五百里諭
令知之○諭前因李續宜奏懇賞假四十日當經批准俟假期滿
後卽迅速起程不准再有續請見在假期將滿該撫自當懷遵前
旨剋日起程矣渡江竄皖之賊見虜聚於含和巢縣一帶該省軍
情一切戰守事宜在在均關緊要必須李續宜抵任後懾服悍練
掃蕩捻巢皖北軍務方有頭緒直隸山東賊氛徧地逼近畿輔亟
盼僧格林沁分兵前來掃蕩惟必須該撫到皖以後僧格林沁方
能察看情形抽身一行或撥兵助剿是李續宜之赴皖爲三省軍
務安危所繫尤爲刻不容緩該撫忠義性成深爲朝廷倚賴著卽

迅速起程以副委任毋稍遲延將此由六百里諭令知之○諭吳
棠奏准提督李世忠咨稱僞忠逆糾眾號稱二十萬陸續渡江今
已四日聲稱上接和含之賊並分股東竄等情當即飛飭總兵安
勇等嚴防蔣壩等處要隘並添派副將蔡觀賢等督帶礮船協防
湖面各等語前據都興阿奏僞護賀齊三逆均抵金陵號稱五十
萬實數確有二十萬眾有由下關渡九洲竄撲儀揚從邵伯直
撲裏下河之信此時僞忠逆糾合大股陸續渡江四日之久尙未
畢渡其人數之多已可概見都興阿等於上下游分設統領四員
派定地方各專責成布置尙屬周密富明阿親往沿江察看亦稱
聲勢均極聯絡惟該逆垂涎裏下河完善之區蓄謀已久見在悉
眾東趨其勢甚銳都興阿等當嚴飭水陸各營加意防範先固藩
籬然後乘間挫其兇鋒擊其情歸不得稍有疏虞致令掣動全局

前次派援金陵大營之楊心純等軍並著趕緊調回原防以厚兵力至江陰等處逆匪前據都興阿奏有分竄江北之意都興阿已派馬隊翼長杜嘎爾親帶練卒詳察各路溝渠險要遠近形勢豫籌破敵之策見在各該處賊情若何杜嘎爾操練兵隊已否嫻熟並著隨時具奏以慰懸系將此由六百里諭令知之○諭吳棠奏派兵扼防蘭郊股匪並黃國瑞一軍偪攻長城逆壘情形等語捻匪李城等股援長城踞逆圍撲官軍營盤經黃國瑞督兵迎擊頗有斬擒而援賊馬步萬人復由西北兩路擁至長城踞匪亦開門衝出復經黃國瑞等分投衝殺斃賊無數賊始敗退黃國瑞一軍自入東境後疊次出力甚屬可嘉惟該營兵力太單恐成腹背受敵之勢昨據譚廷襄奏攻剿北路情形當因黃國瑞營盤緊要諭令僧格林沁嚴催德楞額迅速進兵此時該處賊援麇至亟應厚

集兵力以遏賊氛著僧格林沁懷遵前旨嚴飭德楞額趕緊前往策應並飭富和等軍一併相機會剿譚廷襄吳棠督飭黃國瑞等就見有兵力迅克堅圩毋畱餘孽蘭鄴海贛境地毗連李城等股若爲官軍擊敗不能與長城踞匪勾結勢必悉眾東竄譚廷襄吳棠務當嚴飭在事員弁實力堵扼毋令賊蹤闌入本境儻有疏虞惟該前撫等是問僞出逆糾眾渡江其蔣壩三河等處險隘已據吳棠飭令總兵安勇等妥籌防範並添撥礮船協守卽著飭該總兵等嚴密防剿不得稍涉大意將此由六百里各諭令知之○又李鴻章設局勸辦京米並飭湖廣江西等省購運○于安徽陣亡縣丞沈煒等祭葬世職○庚辰諭議政王軍機大臣等都興阿富明阿奏水師截剿竄渡賊船及調撥水陸各情形一摺據稱僞忠逆調集常州等處逆匪晝夜渡江正月十三日副將馬步雲挑選

礮划衝過九洲迎剿擊壞賊船無數殲斃逆匪甚多後因九洲賊船駛動開放大礮我軍未能深剿遂卽收隊回防並據該副將等探稱賊眾大半皆於黑夜乘間偷渡自初十日起至今渡過髮逆實有三萬餘眾僞護逆已率眾繞越江浦上竄安徽省見有數千餘賊在九洲之下紮營聲言仍有後隊尙未過江一俟到齊由僞忠逆帶領下竄儀揚等情又據副將劉成元探稟四墩子土橋等處皆有長髮男丁多者數千少亦二三十百餘不等迨經盤詰均稱難民來往船隻間有槍礮經該將軍等飛飭劉成元妥爲稽查彈壓並通飭各營一體禁止復飭吳全美親帶師船駐江靖一帶查禁北渡各船運司喬松年將北岸港汊酌量釘塞裁減局卡函商鮑超將王可陞劉連捷兩軍抽撥以應北岸之急等語所籌均尙周密此時該逆銳意東竄都興阿富明阿務須飭

令水陸各將弁晝夜嚴防無稍疏懈如逆蹤徑犯儀揚該將軍等以逸待勞定能出奇制勝痛挫兇鋒四墩子等處長髮男丁稱係難民甚屬可疑何不令其趕緊薙髮設法安置且既係難民何以來往船隻間有槍礮必須嚴爲盤詰如係假託難民卽當認真擒捕使逆賊聞而膽寒自不敢遽行竄撲劉成元駐紮泰興兵勇如果不敷分布卽趕緊撥派馬步以厚兵力鮑超等軍旣已得手上游賊勢較鬆如能抽出王可陞劉連捷兩軍赴北岸助剿自更得力著曾國藩酌度迅調該逆渡江後如分竄各處則力單易制各處兵勇尙可制賊如合併一處卽就近抽撥兵勇以全力應之不得稍有疏失都興阿等呈遞軍機處信函據稱李世忠與苗練因爭鹽利在洪澤湖打仗將礮划等調去多隻見當江浦浦口防務萬分喫緊之時該提督受恩至渥宜如何激發天良及時圖報乃

因一時小忿訓兵赴闕置大股賊匪於不顧實屬不知緩急貽誤戎機著會國藩飛飭該提督趕將兵勇調回防所毋任該逆得以逞志江北該提督勇敢夙著諒不至樂私鬪而忘公戰也信一件著鈔給會國藩閱看並著會國藩節錄李世忠閱看不可使該提督知此事係都興阿所言致生嫌隙爲要將此由六百里各諭令知之○河南巡撫張之萬奏皖捻麇集豫省合以陳逆各股其餒甚熾我軍張曜在北余際昌在南聲勢間隔益形單弱當經飛商毛昶熙派遊擊邵春仁等馳往接應正月十八日張曜派參將尹嘉賓督率兵勇乘夜馳至侯寨連破賊壘三處殺斃悍賊二百數十名其竄至油店橋一股亦經李忠奎率領本部竭力勦擊十九日張曜復親督馬步出擊殺賊數十名是日余際昌探知皖捻已由油店橋竄過華莊正在整隊進剿適陳大澹等率眾來犯當卽

列隊迎戰殲斃百餘名而皖捻馬隊數千馳至包鈔我軍之後余
際昌趕卽分兵東西兩路迎敵擒斬無算該逆復會合馬步來撲
將我兵衝爲數段昌勝左右剛銳新後各營均被圍困余際昌驟
馬衝突各勇均踊躍用命突出重圍仍就原壘紮住張曜因余際
昌營盤後路隔絕於二十日夜親率馬步由頓家岡往援邵春仁
等亦由正陽拔隊馳往援勦該匪見我兵雲集且又知後來大股
在鹿邑地方爲僧格林沁勦敗接應無人遂於二十一二等日西
遁圖撲新蔡縣城復經邵春仁等渡河擊敗該逆遂折西北竄至
李莊橋查李莊橋四面皆有賊寨正北一面則荒坡各寨最爲猖
獗臣嚴飭各軍聚集一處並激勵鄉團以爲四面兜圍之計查此
次竄捻原係兩股其與陳大澐合者則陳大常袁汝愚秦喧孫四
司張瀾滄洪馬瞎等由陳家空而竄李莊橋者也其劉狗孫臭等

一股經僧格林沁派副都統桂克金帶領馬隊於十八日賊竄鹿
邑時截殺無數十九日賊竄平鹿邑城東復經續派馬隊於二十
日由魏橋追殺殲斃數千名生擒百餘名該賊向東北逃竄查此
股賊匪既經蘇克金等擊敗不至西竄而汝南情形喫緊且該逆
各股馬隊甚眾我軍步隊追之不及臣已飛咨僧格林沁迅飭該
副都統卽率得勝之師探蹤而進與豫軍合剿以遏寇氛 上諭

皖捻麇集阜陽境內與陳大澐各股勾合經張之萬毛昶熙督飭
諸軍合擊匪眾焚巢西遁竄至李莊橋等處與陳逆平輿舊巢甚
近若不及早殲除必致益形滋蔓張曜見已繞出賊前扼賊去路
並經張之萬催集各路追剿之師一面激勵鄉團爲四面兜圍之
計著卽嚴飭兵團奮力攻剿務將陳大澐迅速殲除以免與皖捻
勾結劉狗等股匪已經蘇克金所部及僧格林沁續派馬隊先後

在鹿邑擊敗不至西竄該撫見已咨行僧格林沁俟蘇克金將此股擊退卽令率得勝之師馳赴豫境與汝南各軍會剿陳大常等股匪惟賊騎飄忽靡常深慮此剿彼竄官軍追躡常致落後張之萬等務當認真扼截俾該逆不能遠竄庶蘇克金等馬隊可以追及汝南與豫軍會合夾擊至臨漳內黃土匪崔興見經地方官訪獲正法其支文炳一犯仍著迅飭所屬嚴拏務獲勿任漏網崔興係聚眾滋事首犯謝三既將該匪首窩藏豈有不知情之理嗣後該撫於此等通匪要犯務當立行嚴辦以儆奸頑毋須再事研訊轉致稽遲寬縱也將此由八百里各諭令知之○諭熙麟奏甘省軍情緊急一摺據奏接准西麟咨據隆德縣知縣李超羣飛稟固原突被回匪擁入焚殺漢民始盡道員萬金墉被害見在回匪大股仍踞瓦亭道路梗塞當經台行延綏歸化及蒙古東西兩旗等

官兵星馳赴固熙麟帶同黃得魁兵勇繞道赴甘將於慶陽暫駐
請飭多隆阿雷正綰等派撥勁旅交馬德昭統帶繞路慶陽取道
赴甘或卽令雷正綰回固原提督本任辦理等語又據多隆阿片
奏回匪攻圍盤鄂係省城糧路見令雷正綰迅調新募四營移紮
咸陽馬德昭一軍仍駐省城與穆騰阿等辦理西安防守並陳近
日力攻王閣村等賊巢情形陝省軍情東西兩路均形喫緊陝南
興漢各匪又復紛乘多隆阿之軍業已不敷分布固原重鎮爲陝
甘兩省咽喉突爲回匪竄陷尤須迅速撥兵剿辦雷正綰專辦陝
省西路須馳解鳳岐之圍並兼顧涇原盤鄂等處斷難分身馬德
昭留防西安勢亦難卽移動固原被陷萬不可令賊久踞惟有速
催所調延綏歸化及蒙古等兵星速併集以利攻剿著熙麟飛催
所調延綏鎮兵一千名德勒克多爾濟及塔清阿速將恩麟咨調

歸化城官兵二千名剋日由定邊等處馳往固原會剿並著奕梁將前次咨行聽調之阿拉善等處及東西兩旗蒙兵一併飛檄由甯夏鹽茶一帶星馳赴固毋稍稍延固原等處前據恩麟疊奏布置情形何以此次猝被回匪擁入焚殺毫無豫備可見平時係屬紙上空談全無實際著熙麟恩麟將此次固原被陷及萬金塘等被害情形均卽查明詳悉具奏前由英桂轉解多隆阿軍營之京營炸礮子一項多隆阿會否收到此時攻擣王閣村等處賊巢正資利用此項炸礮京營火器營員弁善於施放該大臣營中定不乏此項員弁卽可用其所長督率兵勇速圖擣穴擒渠以彰撻伐多隆阿疊奏成功卽在指顧故於各路請撥請援皆不肯分其兵力該將軍當以全力迅奏膚功以副殷望毋稍存輕率之心或致中賊詭計是爲至要穆圖善等受傷應不甚重省城防守仍飭馬

德昭等妥辦雷正綰西路進兵如何分布均著隨時具奏甯夏等處勦撫辦理如何著奕梁隨時具奏將此由六百里各諭令知之○駱秉章奏查石逆此次回竄敘南銳意欲渡金沙江經臣調派總兵唐友耕等暨張亮基所派之參將楊發貴等嚴密防堵該逆無隙可乘遂於橫江左右聚集悍黨數萬夾河爲壘中搭浮橋以通往來石逆擁眾自踞雙龍場以爲後應捧印村張窩等處皆徧紮賊壘以爲持久之計臣當飭臬司劉嶽昭統兵攻雙龍場並令提督胡中和等軍分道進偏距賊二三里安營十一月十九日賊分三路來撲胡中和營盤我軍堅壁靜守俟賊銳氣稍衰胡中和開壁出擊並飛調守備曾鳳鳴帶練截賊之後賊殊死鬪遊擊胡萬浦首先陷陣手刃賊目二人悍賊數名伏賊先潰胡中和親督各營乘之賊不能支蕭慶高等先已督隊由穿牛鼻等處直擣橫

江賊巢賊憑卡死拒適胡中和追賊至此遂前後夾擊斃賊一千餘名其丁水寨筆架山兩處賊卡亦經劉嶽昭攻破十二月初五初九兩日又將巡司場新場竄出之賊剿殺殆盡石逆知我軍漸逼乃於雙龍場增賊營二十餘座橫江雙龍場兩處賊壘林立卡堅路險未能急攻劉嶽昭探知賊目郭集益等有投誠之意乃草檄交守備劉節高等潛入賊營諭以自新郭集益等歃血獻書願爲內應適胡中和等探得橫江山後有小徑可通賊巢此路賊防稍懈遂與劉嶽昭於十二日同時並舉是日蕭慶高何勝必分道而進直抵橫江賊卡之前與賊正相持間蕭慶泗等將東嶽廟賊營放火延燒鍾玉勝復以大礮將油房鎮賊卡轟裂我軍見兩處得手同時奮勇直前連破賊卡二十餘處胡中和復帶各營由山後小徑破卡而入該逆腹背受敵伏牆死拒總兵劉景春發火礮

其輜重我軍四面突入賊眾冒煙驚竄共斃賊五六千人內有賊目數十名敗賊沿岸狂奔我軍乘勢奪橋將橫江西岸賊巢焚毀兩岸敗竄之賊墮河淹斃及乘間逃散者約計數萬我軍合隊跟追見場後山腰尙有賊壘一座內皆精悍老賊胡中和等遂分軍追賊親督三營圍攻當路賊壘約及三時之久賊中鉛丸將盡繼以鍋鐵碎石總兵唐應聘摩壘先登右肩左腹連中槍傷殊不少卻名勇大呼齊上始將賊壘攻破斬馘一千餘名維時蕭慶高何勝必並將唐家坡等處賊壘節節掃蕩追至張窩復將該處賊壘六座平毀統計橫江兩岸攻拔賊卡三十餘處踏破賊壘二十餘座前後斃賊二萬餘人生擒二千七百餘名是日劉嶽昭分軍進攻雙龍場遙聞賊營紛呶不定火光驟起知有內變卽督隊分路攻撲賊已自亂我軍乘勢立破其營二十餘座前約內應之郭集

益等各率願降之眾自內投出適會紀鳳等由賊後鈔殺而來前後奮擊殺賊無數並將捧印村賊巢踏毀統計是役破賊壘二十餘座斃賊一萬五千餘名陣斬僞都督等四十餘名橫江西岸敗竄之賊奔至會儀溪新灘溪一帶與屏山一江之隔唐友耕等恐賊乘間偷渡循岸周防十二日夜果有賊匪竄渡立被遊擊唐大有擊退次日遙見對岸火光唐友耕卽派唐大有督兵渡江設伏並令涂開科帶勇直前誘敵該逆見我軍甫渡趨擁來撲我軍伏兵突起賊首尾不顧落水及被殲斃者一千餘名見據劉嶽昭馳報石逆率餘黨向燕子灘渡過橫河我軍擊其半渡斃賊千餘餘皆遁入滇境查石逆盤踞敘南時圖搶渡金沙江肆擾腹地經唐友耕等力遏兇鋒該逆迄不得逞惟此寇一日未滅一日不忘注意川疆度其詭謀或將由巧家廳以窺甯遠或復竄會儀溪一帶

冀從屏山雷波渡金沙江或暫時鼠伏滇邊僞作向東川之勢誘
我撤兵遠顧遂乘虛回竄敘南使我不及援應查敘郡西至甯遠
紆折二千餘里而滇境自大關走巧家廳旬日可至賊往來甚捷
我軍兼顧萬不能及如徑入滇境跟蹤追躡不惟軍行缺食裹糧
維艱且虞道路紛歧兵由此往賊自彼來回援稍遲鞭長莫及儻
被軼入腹地轉致滋蔓難圖是甯遠之援旣難稍緩而敘南之師
不宜驟分臣再三籌度見飭唐友耕熊煥章兩軍仍嚴防安邊屏
山而檄湘果果後各軍徑渡橫江西岸以爲追擊之兵卽截回竄
之路另調總兵朱桂秋副將秦華祝帶兵由雅州馳赴甯遠會同
該處兵練相機迎剿庶我軍不至爲其牽掣而逆謀難以狡逞矣
上諭石逆盤踞橫江雙龍場兩處蓄意搶渡金沙江經臬司劉
嶽昭提督胡中和等攻克堅巢斬馘數萬洵足大振軍威惟前據

駱秉章奏該逆由滇襲脅至十餘萬見雖經此大挫紛竄滇境而張亮基所奏復有大關等處迎擊石逆賊仍返奔川境之語且披閱張亮基所獲逆書該逆注意徑取敘郡屏山護官村之賊欲由昭通渭林直抵回溪司造橋渡河是其蓄意渡江回竄敘郡已可概見駱秉章見派唐友耕等嚴扼安邊屏山檄湘果果後各軍徑渡橫江西岸追擊即著飭令帶兵各員實力堵剿毋任回竄該逆中旗一股前已竄至會理州之窪烏司等處此次竄滇之賊如由巧家廳接踵前往亦在意中總兵朱桂秋所帶楚勇三千即著飭令速赴甯遠會同該處兵練相機剿辦並著潘鐸張亮基徐之銘督飭帶兵員弁將竄入滇境之賊與川軍會合夾擊大張撻伐毋畱餘孽石逆見竄何處並著駱秉章等確探具奏至川省擬請續辦按糧津貼一節前因有人奏已革藩司祥奎改畝捐之名爲按

糧加派苛勒民怨沸騰會諭駱秉章查明參奏此次該督所請白
係實在情形但使籌畫妥協自不妨照議辦理著將前件查明覆
奏再行降旨本日據韓超奏接據徐之銘咨稱黔省回教張翎翔
圍攻新義商令馬如龍派委馬助國前往議撫飭安義鎮總兵趙
德昌停兵止仗旋又稱馬助國在滇有經手事件另派回民皇甫
遜前往辦理以致趙德昌停兵止仗逆回愈肆猖獗疊陷安南興
義二城等語徐之銘前委桂金輪赴黔議撫會諭該撫查明撤回
尙未接據覆奏何以此次復欲派員前往咨令停兵致令該二城
被陷究竟是何意見馬如龍如果辦理確有把握何以反令回匪
益肆猖獗疊陷城池著潘鐸徐之銘迅將辦理情形據實覆奏將
此由六百里各諭令知之○諭韓超奏回匪連陷安南興義分擾
郎岱等廳州進剿情形並沈宏富難任提督及覆陳臬司未能和

表各摺片此次黔省因誤信徐之銘撫議致興安等城爲賊攻陷
所有帶隊之總兵趙德昌著准其暫免參處韓超與田興恕亦免
其議處仍著韓超督飭在事文武迅圖克復將回匪痛加剿除毋
令分擾他處貴州提督已令張亮基前往署理韓超自請暫行兼
署之處著毋庸議仍著韓超催令田興恕剋日赴川剿賊不准藉
詞再爲奏畱自干重咎田興恕赴川後如張亮基尙未到黔著將
貴州提督印信暫行封存俟張亮基到時交其接收韓超覆陳龔
自閔未能和衷情形並俟張亮基到黔時由該前督查明情由具
奏再降諭旨將此由六百里諭令知之○諭前因貴州教民一案
疊經諭令勞崇光迅速赴黔會同崇實等查辦本日崇實奏委員
查明教民案件情形請將戴鹿芝曲賜矜全多文送部引見各摺
並鈔錄與胡縛理議單呈覽均交總理名國事務衙門速議具奏

崇實另奏查明田興恕參款暨黔省地方軍務情形各摺片著畱
中俟總理各國事務衙門覆奏之日再降諭旨將此由六百里各
諭令知之○予安徽陣亡知州陳學仁四川陣亡遊擊胡萬浦等
祭葬世職○辛巳諭議政王軍機大臣等官文嚴樹森奏蘇常髮
逆圖竄皖北以擾鄂疆一摺皖北和含巢一帶尙有賊蹤若忠逆
復率大股前往勾結上犯楚疆該省穆正春王桐柏所部兵力尙
單殊不足禦此狂氛著會國藩督飭皖北各軍實力剿洗或添撥
勁旅前往協剿或進擣蘇常攻所必救以分其勢俾不至竄入楚
邊方爲妥善左宗棠在浙剿匪見在極爲得手若乘此聲威直擣
杭嘉等郡則該逆勢必回顧蘇常無暇圖犯鄂境應如何進剿浙
西以掣賊勢之處著左宗棠悉心籌畫妥爲辦理將此由六百里
各諭令知之○諭嚴樹森奏鄂省舉武聞鄉試循例辦理主考事

宜一摺前因漢南軍務喫重疊經諭令嚴樹森卽日出省馳赴秦
鄂交界地方扼要駐紮督飭梁作楫等越境馳剿見在興安未復
賊氛甚熾陝南無兵可調剿辦正當喫緊嚴樹森仍當懍遵疊次
諭旨星馳出省督飭各軍剋期規復興安郡城以副委任所有該
省武闈主考事宜著派員辦理以專責成將此由六百里諭令知
之○官軍擊敗朝陽流賊諭景綸等搜捕餘匪○諭晏端書等迅
解鎮江軍營協餉○壬午諭內閣瑛棨奏興安兵團收復新舊兩
城一摺髮逆陳得才等竄陷興安府城意圖久踞圍總監生邱振
家招集團勇於本年正月十四日會同知縣方傳理督率水陸各
勇及城守官兵乘夜薄城該匪猝不及防放火奔逃官兵一擁而
進當將興安舊城收復縣丞周錫齡等乘勢趕至新城適該匪出
城奔竄兵團併力尾擊追殺十餘里興安新城同時收復監生邱

振家激於義憤奮勇殺賊克復城池實屬異常出力著先行賞給六品藍翎以示優獎○諭議政王軍機大臣等崇厚等奏東匪大股直撲河岸官軍併力擊退一摺張錫珠等股匪敗竄河東見在糾合大股直撲大營河口等處搶渡經官軍擊退仍在沿河一帶游弋時思北竄是該逆狡謀迄未稍息著崇厚督飭黑龍江馬隊並飛調洋槍隊併力扼截並分飭沿河各營弁嚴密梭巡來則攻擊毋稍疏懈寶山成保已赴館陶著就見帶兵勇往來策應遇其分竄譚廷襄計日可抵東昌距直省較近當與崇厚等聲息相通著飭令馬步兵勇並海羣等軍會同直隸官軍併力埽蕩迅殲醜類崇厚請調王佐臣趙喜義均係勝保舊部平日打仗尙稱奮勇著准其札調來營以資差委但勝保平日治軍不嚴所部兵勇多無紀律王佐臣等到營後著崇厚隨時察看儻驕恣不守營規或

有任令部眾騷擾情事務當從嚴懲辦毋稍姑容將此由五百里各諭令知之○諭據曾國藩奏代陳李世忠因勝保逮京治罪懇請褫職立功贖罪一摺將帥爲國家大臣貽誤軍務罪有攸歸刑章憲典稟之列祖列宗非朝廷所得而私勝保以督率大員種種貽誤疊經中外參劾猶恐被人誣毀復密派大臣確切訪查始行逮京治罪此豈臣下所得代爲乞恩曾國藩據李世忠之稟率行具奏揆諸體制殊有未協見在江南逆匪紛紛渡江李世忠受恩優渥官居專閫自當迅速立功以圖報稱卽前此該提督經勝保拊循保全亦由仰承文宗顯皇帝如天之度准其投誠得以邀此異數該提督自應力矢公忠不得專顧私誼如此瀆請姑念李世忠本係武夫不深責備所有自請褫革之處加恩改爲革職畱任曾國藩卽轉飭該提督迅將九洑洲等處賊匪奮力擊

勦不使該逆旁竄辦理確有成效由該大臣奏聞聽候諭旨勝保功罪朝廷自有權衡固無庸臣下喋喋爲也將此由六百里諭令知之○諭賞罰大權操之自上非臣下所能干預李世忠以閩外武臣竟敢瞻顧私恩實屬膽大妄爲會國藩接閱信函據理駁回自是正辦卽據情代奏亦應將李世忠請加處分以肅綱紀覽會國藩所奏但云李世忠係勝保招撫之人此次籲陳私悃何敢壅於上聞而於此事如何處置不贅一詞是該大臣此奏委婉曲折於見在時勢權宜輕重亦甚費苦心前因勝保貽誤各情被參多款革職逮治將來如何發落朝廷自有權衡乃李世忠忽有此立功代贖之請固不能因之激怒而有所增加亦何能因此遷就而稍從末減惟和含未復護逆復率眾渡江皖北軍情喫緊勦辦正需兵力著會國藩乘機激勵飭令李世忠認真勦賊奮勉圖功如

該提督果能鼓勇前進盡力埽蕩俾渡江逆匪不敢窺伺儀揚或協助官軍攻取巢和各城於軍務亦甚有裨益也總之勝保之罪實由自取卽按軍法懲治亦何足惜惟李世忠陰鷲性成越分瀆請若遽繩以法律重加嚴譴是堅其獷悍之性轉於江北軍務無益且昨據都興阿等寄軍機處信函有見與苗練因鹽務構釁在洪澤湖械鬪之語是李世忠不顧大局已可概見見在自願立功以贖勝保之罪卽當因其機之可轉責以立功惟在該大臣相機而驅策之俾不得以空言嘗試方爲妥善本日已另有寄諭一道該大臣奉到後卽酌量宣示李世忠其未便宣示之意特再寄諭該大臣以便參觀互證將此由六百里諭令知之○會國藩奏浙江提督鮑超上年十一月二十七日在楊柳鋪及本年正月初六日涇縣擊賊獲勝後聞小淮窯地方有賊紛擾鮑超以該處守兵

單薄水陸糧路可虞乃督馬步馳赴黃麻渡會合王可陞防軍誘賊過河一擊敗之旋報花旗廣匪六萬餘眾由甯國縣進竄馬頭鎮高橋楊柳鋪一帶鮑超營盤被賊阻隔卽自高祖山老營至清弋江南陵亦幾爲賊氛所梗鮑超恐老營有失遂至黃麻渡還援遙見四面烽煙紛起知僞跟王藍逆一股已對高祖山下寨僞侍王李逆一股已對清弋江下寨另有賊騎數萬由寒亭高祖山摩壘而過繞出抱龍岡襲我營之後鮑超既次清弋江先派宋國永守定高祖山二十七日督率各營徑由抱龍岡進攻該賊恃眾分拒密布長圍鮑超令梁美材等自山岡後分兩枝鈔入截賊數段賊隊大亂奪路竄奔諸將士合力薄之遂將馬頭鎮等處十數村賊壘一律平毀追襲近六十里殲擒近八千人自有此捷凡附近我營之高嶺梅嶺麒麟山各賊股伏匿不出正月初一日僞匡

王奉王襄王糾合花旗股匪竄入大坑黃村近偪涇縣城南包過城東擁眾六七萬人連營二十餘座初四日該逆架梯撲城維時鮑超在高祖山聞警恐涇城不支將貽甯郡後路之患乃簡隊疾馳九十里初五日抵涇入城少息初六日五更時拔關齊出先遣王衍慶等分匿叢箐深樹間而以易開俊等遙爲之應復令婁雲慶等依山而上譚勝達等循河而上鮑超督飭梁美材等暨黃海清等騎隊直前挑戰羣賊爭相出巢從小梁撲下婁雲慶等正當其衝梁美材黃海清等馬步競進戰逾兩時我軍佯退引賊將近山麓伏兵頓發婁雲慶等回鞭轉鬪兩面夾擊賊乃大敗正欲歸壘瞥見壘中火起已爲譚勝達等所破我軍乘勝併進盡掃羣壘立解涇縣之圍長驅三十餘里遂入黃村賊不虞官軍之驟至有棄壘欲遁者有閉壘死守者眾軍士擁至濠邊肉薄而登又平數

十壘追二十里至大坑斃賊數萬初七日鮑超自涇縣回軍適西河之賊撲近寒亭高祖山老營將回乘虛一逞忽見旗幟蔽空軍容甚盛乃相顧錯愕卽一闕走散臣查甯國境內徧地逆氛鮑超以病餘之將新補之卒四出雕勦得此兩戰軍威可以復振危局可以暫安所有出力人員可否酌給獎以以作士氣至參將羅國才等六十七員力戰陣亡相應請旨飭從優議卹又奏據駐守涇縣總兵易開俊稟稱甯國縣另股於十十一月竄近涇縣東北潘村一帶易開俊商同吳廷華分路進攻吳廷華率所部兩營會合葉明瑞等進攻潘村以蕭章開馬隊應之易開俊親率三旗直趨晏公堂王華國楨率兩旗分路包鈔殺賊數百人而潘村之賊亦經葉明瑞擊退吳廷華追過壩頭葉明瑞等由晏公堂大路斜刺而來會軍夾擊賊眾大敗遁入黃村官莊一帶易開俊

以賊遁未遠不速除之終貽後患仍與吳廷華督率各軍分道馳
勦卽將黃村官莊之賊擊潰不料山坳伏發遽斷歸路敗賊回戈
助戰我軍困入垓心易開俊馬傷墮地蕭章開大呼救之乃得更
騎突圍而出將隊伍連環收歸軍士已多傷亡二十八日賊黨乘
勢撲城見城上守禦謹嚴退去正月初三四等日賊以大股環城
奮攻晝夜不息競於矢石中架梯而升易開俊吳廷華令守垛士
卒立斬數人擊毀攻具蕭章開曹義勝復潛出鈔賊賊始歸巢初
六日鮑超引軍來援城中士氣益奮突出盪擊俘斬甚眾卽平毀
附城諸壘旋入黃村痛加勦洗臣查涇軍七營久與悍賊相持卒
能保全危城遮護甯郡洵屬有裨全局所有節次陣亡之參將倪
昌明等五十一員相應懇恩飭部從優議卹又奏金陵甯國各營
穩守如常太平石埭等股踰伏未動宣城縣屬之金寶圩於上年

臘月二十日被僞侍王攻破該圩練丁逃至蕪湖者數千

臣爲編

營安插聞侍逆在圩中大掠米糧仍圖窺伺蕪湖金柱關一帶該

兩處防務暫難鬆勁北岸無爲州原駐樹字五營本係李鴻章新

募之卒見因救援常熟進攻崑太兵力不敷飛調樹字等營回滬

另撥韋志俊一軍駐防無爲州城蕭慶衍專顧銅城牐一路尙足

防禦毛有銘專顧巢縣一路實形單薄又在六安州抽兵助之惟

九洑洲江面續有賊船百餘號晝夜趕渡據搜獲僞文賊欲先攻

浦口江浦以通進兵之路

臣

恐前敵各防未能穩固亟須親往察

看通籌攻守事宜此次拜摺後卽日由水路駛赴金陵及無爲州

蕪湖金柱關等處巡視一次往返約需月餘安慶省城兵勇尙有

四千餘人責成司道各員權爲統率暫可無虞萬一巢縣踞匪蓄

意西竄

臣

亦卽兼程旋省以顧根本

上諭九洑洲江面賊船晝

夜趕渡會國藩恐前敵各營未能穩固自應親往察看俾攻守悉臻妥善惟江浙軍務互爲表裏此次賊趨江北若浙師出奇制勝直擣杭州自可牽制賊勢見在金華等處均已克復紹興賊勢已孤指日可下乘勢規取杭城易於反掌第杭城不難於取而難於守嘉興未復則賊由石門等處可以西趨湖州未復則賊由德清等處可以南竄左宗棠克復杭城後若拘泥成例駐紮會垣賊以游師擾之必有應接不暇之勢不如督率勁旅相機進剿仍分兵徽州以清皖南之賊俾朱品隆等酌撤渡江會台毛有銘等軍迅克和含等處水陸兩路併力規取九洑洲肅清江面則皖北可期穩固然後合鮑超甯國等軍攻取金陵或酌分奇兵旁取句容丹陽以圖常州似剿辦較易得手著會國藩左宗棠酌度機宜妥籌辦理將此由六百里各諭令知之○僧格林沁國瑞奏正月十八

日蘇克金等與賊接仗因匪眾兵單未能痛加剿洗十九日翼長舒通額馳抵鹿邑會剿二十日蘇克金等帶兵行至鹿邑魏橋地方該逆見我軍趕至卽在渦河南北兩岸列仗抗拒勢甚洶湧我軍分三路迎剿斃賊多名該逆猶抵死不退經恆齡舒通額等更番轉戰自辰至午賊隊始潰我軍乘勢掩殺甫將各股馬步殲除殆盡西北旋又來馬步賊匪數股直撲我隊舒通額等各帶隊伍一面截擊一面繞至賊尾直前衝擊賊眾大亂遂向東南奔竄我軍奮力追擊二十餘里賊屍枕藉二十日復探逆首張落刑等股竄赴東路宿州等處欲由徐州北竄山東東竄清淮當派都司施紹恆等帶兵前往會同宿州知州英翰探蹤追剿旋於二十六日據英翰等稟報該逆探知西路擒匪業被我軍截剿又於二十三日經施紹恆帶隊馳抵袁家集截殺馬賊數十名該逆不知我軍

多寡遠於二十四日潛回老巢臣等卽於二十七日帶領馬步官軍移紮亳州渦河北岸之廟集偏近白龍廟逆首劉狗兒等巢穴至西竄沈項捻匪於二十七日接張之萬函稱此股捻匪經余際昌迎剿未能得手請撥兵會剿等因查臣軍見在偏近捻匪老巢該賊情急思竄日夜嚴防尙覺我軍單薄一時實無可分之兵業已函致張之萬就見有兵力先行設法剿辦一俟臣等騰出兵力再行撥兵應援上諭皖省捻匪經此次痛加懲創其膽已寒自可無虞西竄惟張落刑一股最爲兇悍此次率眾思竄雖經僧格林沁派令投誠降眾截殺回巢而其勢未蹙必應趕緊剿滅見在僧格林沁偏賊而軍卽著相機進兵將渦河迤南各捻匪分別剿撫以孤張落刑之勢庶巨憖易於成擒不至四出滋擾直東股匪甚熾譚廷襄雖調撥馬隊與直隸官軍會合而匪眾兵單恐難蕆

事該大臣將張逆一股迅速辦結仍須回顧直東至沈項等處賊巢林立張之萬毛昶熙務當督飭余際昌等就見有兵力迅速進剿不得專待援師致滋貽誤將此由六百里各諭令知之○諭瑛榮奏收復興安新舊兩城及探聞梁作楫等越境追剿並襄城失守旋即克復各摺片此次兵國會合克復興安新舊兩城洵屬迅捷惟該逆西竄漢中設與藍曹各逆勾結則剿辦更形棘手梁作楫已帶楚軍由竹山等處越境追剿頗能不分畛域著官文嚴樹森飭令跟蹤西進並著瑛榮飭令邱振家乘勝帶團力追即傳諭毛震壽派兵會同夾擊以期盡殲醜類此股髮逆人數究有若干據瑛榮具奏既稱竄入漢陰紫陽一帶何以又有繞竄四川之語著駱秉章查明迅速前旨飭令周達武節節進剿會同楚陝各軍相機殲除以清邊患瑛榮另摺奏多隆阿函稱回匪勢大剿不勝

勦屬該撫由省城次第招撫以冀早日竣事見在兇氣正盛未可輕易議撫等語昨據多隆阿奏稱已將王閣村羌白鎮攻克勦辦正當得手何以該大臣忽有招撫之議是否此信係逆回偽造抑或多隆阿欲以此解散勾結之心著多隆阿據實具奏襄城雖已收復該文武所司何事著瑛棨查明下落參奏該匪見回寶山老巢並著飭令毛震壽剋期殲除毋稍遲誤再瑛棨另片奏知府馬百齡由回巢進省請撤銷卹典等語馬百齡在回巢十月之久今忽從賊中來省所稱被匪拘留各情未可輕信著瑛棨派員看守毋令在外滋事並勿得再爲所欺如有逃逸惟該撫是問將此由六百里各諭令知之○諭張之萬查參河南浮收州縣○予安徽陣亡參將羅國才等祭葬世職○予陝西陣亡知府林映棠等祭葬世職建祠○癸未諭議政王軍機大臣等耆齡奏官軍克復湯

溪縣城殲賊殆盡並連克龍游蘭谿金華永康武義各城一摺此
次閩浙官軍奮勇殺賊於三日之間連克府縣六城我軍勢成建
瓴可期席卷而進卽著耆齡左宗棠嚴飭各營將弁乘此聲威次
第掃蕩趕緊規復紹興毋得稍有稽延致失時會耆齡另片奏閩
軍節節前進相去浦城漸遠擬移紮浙境以便調度惟探聞各城
敗匪分竄桐廬分水二縣如歸併杭州擬進紮金華督戰儻竄入
徽郡則江西戒嚴仍須駐紮府城力顧邊界等語所奏不爲無見
第金華等處既有蔣益澧一軍駐守又有左宗棠督率調遣以之
進剿必可收破竹之功而桐廬分水一帶賊蹤未淨其或竄徽郡
或竄江西均不可不防閩江毗連隘口林立仍應妥籌守禦耆齡
總以仍紮浦城爲是遠可策應湘軍近可籌防閩境所有一切進
止機宜該督隨時與左宗棠熟商籌辦尤宜嚴飭諸將勿因驟勝

而驕稍涉大意將此由六百里各諭令知之○甲申諭議政王軍機大臣等崇厚奏軍餉難繼將領乏人並飭王榕吉總理軍需局各摺片直隸軍營餉項每月需銀五萬數千兩延至四五月間卽難勉強支持該署督旣知餉需難繼卽當抽撥兵勇早渡河東迅速進剿不可畫疆自守稍分畛域致令河東賊燄日張寶山見署提督成保見在軍營督隊該二員身當前敵責無旁貸據云寶山身弱多病成保所部不坐得力如果屬實著崇厚隨時查參據實陳奏免致貽誤軍務仍一面飭令越境攻剿以期早殄寇氛一面知照譚廷襄令其督率兵團會合夾擊以分賊勢前調古北口及熱河官兵各五百名諒可計日到營兵力應足敷用崇厚仍當激勵民團於河西隄岸一帶分布防守以助兵勢並著將河西一帶伏莽趕緊掃除務淨根株至勝保係獲罪大員自應解赴刑部審

訊靜候朝廷處置崇厚前

試甚屬

非是此次又代爲瀆請王榕吉復擅向崇厚呈遞稟詞請令勝保赴營實屬膽大妄爲崇厚王榕吉均著傳旨申飭至王榕吉見帶晉省兵丁赴直須責令督隊剿賊以資得力軍需支應等局本有承辦各員經理該臬司止可隨時稽覈不得藉詞局務羈身置勦匪事宜於不顧有人奏已革臬司孫治前在天津管理糧臺任意浮冒僧格林沁曾以不勝道員之任咨令前直隸總督恆福奏參該已革臬司復有引用親戚楊國杞等隨辦糧臺夤緣超升並所行札諭告示不妥以致州縣紛紛諱盜被人參劾經文煜代爲彌縫各案該臬司屢次被人奏參必非無因僧格林沁如果實有不勝道員之咨見必有卷可查孫治任內印札告示亦可向各州縣調取著崇厚嚴切查明據實具奏不得以保奏在先稍存回護儻

有意欺飾代爲消弭將來別經發覺恐崇厚不能當此重咎也原片著鈔給閱看將此由五百里諭令知之○乙酉諭內閣刑部奏已革兵部侍郎勝保押解到部請派大員會同審訊一摺著派議政王軍機大臣大學士會同刑部審訊按律定擬具奏○諭議政王軍機大臣等譚廷襄奏馳抵東昌進剿並蘭鄒等處剿辦情形各摺片張錫珠股匪由直隸回竄東境經兵團於李官莊樊潭等處邀擊仍回堂邑冠縣等處屯聚賊因官軍勢壯不敢東向復分趨冠莘兩縣境內見在東省已有保德所帶馬步兵二千七百餘名雷鳳鳴等隊一千餘名合之寶山所帶之兵並各縣團勇聲勢不爲不壯直隸官兵見已越境追剿譚廷襄身任封圻於本省剿辦事宜更屬責無旁貸著卽激勵兵團奮勇進攻將該匪就地殲除毋任蔓延他處並著崇厚遵奉前旨添撥兵勇迅赴河東助剿

一面知會寶山與東省聯絡聲勢兩路夾攻一面飭令祝塏嚴扼西路毋令竄入大名一帶地方李城等股匪蓄意由沂郡北竄紛擾郟城莒州境內均經兵勇擊敗復潛撲鄒縣城池被兵擊退著譚廷襄督飭在事文武嚴密扼截並飭會逢年豫爲籌備以杜淄川股匪句合德楞額剿賊不力屢次遷延貽誤見由坊前進軍蘭山之大埠莊賊已折向莒境直趨沂水德楞額處處落後儻不趕緊邀截任令竄入青萊境內卽著譚廷襄據實嚴參按照軍律懲辦將此由六百里各諭令知之○丙戌諭內閣前因江蘇泗江口解圍巡撫李鴻章之弟知縣李鶴章擊退援賊與在事員弁功足相埒該撫意存引嫌未經請獎當經諭令李鴻章查明勞績一體奏請獎敘茲據該撫遵查克復嘉定各案出力人員請獎另片奏李鶴章雖同剿賊乃義分所當爲仍不敢仰邀議敘等語五品銜

分發補用知縣李鶴章戰功卓著豈可沒其微勞著賞加四品銜以知州用○李鴻章左宗棠奏上年十二月已革道員張景渠率兵進攻紹郡逆首糾合蕭山諸暨之賊分路竄至東浦等處希圖包鈔我軍後路經張景渠抽調遊擊布興有等分投截擊賊即敗退並攻毀昌安鎮賊卡一座本年正月初一日我軍由東浦前進分攻昌安五雲兩門未能得手該逆外援日增連日分股竄犯陶堰東關一帶蔓延數十里屯踞烏門山包家山白塔洋分股肆擾均經兵團擊敗共殺賊千餘名所有紹東逆卡一律踏毀城中之賊不敢出戰我軍聲威大振見在仍飭張景渠等相機進攻肅清紹郡併圖省垣李鴻章奏正月初二三日以後常熟孤城被賊圍攻益急署提臣黃翼升督率師船赴福山白茅徐六涇各口攻剿口有斬擒圍城之賊亦分添各口以禦我師編修劉秉璋會同道

員潘鼎新副將劉銘傳等統帶陸隊三千餘人於十三日駛抵福
山與黃翼升籌商登岸黃翼升分派礮船渡師於福山上游之西
洋港陸續上岸連夜紮營劉秉璋潘鼎新等身先士卒指揮齊進
二十日各營往攻福山獲一勝仗周興隆駱國忠等於正月十三
日尙有帛書出城據稱自初十日接到臣處帛書後知援師卽至
人心稍定惟困守月餘將士精力疲憊設使西北門地雷轟發眾
必驚亂恐有不測該將等惟與城存亡等情臣又飛函商令黃翼
升潘鼎新等穩紮穩進先將福山悍賊擊退卽乘機節節攻打又
恐背水之陣軍無後繼擬添派常勝軍馳往援應 上諭議政王
軍機大臣等常熟孤城被圍甚急太倉尙未攻克滬軍勢不能前
往救援李鴻章調派各營進攻福山獲有勝仗著卽激勵黃翼升
潘鼎新等乘勝進攻節節掃蕩以期直達常熟立解城圍如慮後

軍不繼並著飛催常勝軍星速前進穩紮營壘如敢仍蹈前轍任
意退回該撫卽從嚴懲辦以肅軍令俞斌所買靈珀朱草與顏真
卿詩卷墨迹業已交出楊坊購回之東珠朝珠洋金蟒袍料既經
遵繳卽從寬免其深究俟有進京委員委令齎繳仍著該撫畱心
訪察如松滬一帶民間尙存有禁中物件務須卽設法盡數收繳
毋令遲久散失李鴻章另摺奏請飭廣東倣照同文館設立學館
學習外國語言文字等語已諭令廣州將軍查照辦理將此由六
百里諭令知之○諭前據總理各國事務衙門奏遵議設立學習
外國語言文字學館爲同文館當經照所議行該衙門已行知該
將軍等遵照矣因思總理衙門固爲通商綱領而中外交涉事件
則廣東上海爲總匯之所見據李鴻章奏稱上海已議設立外國
語言文字學館廣東事同一律亦應仿照辦理著庫克吉泰晏端

書於廣州駐防內公同選閱擇其資質聰慧年在十四歲內外或年二十左右而清漢文字業能通達質地尙可造就者一併揀擇延聘西人教習兼聘內地品學兼優之舉貢生員課以經史大義俾得通知古今並令仍習清語厚其廩餼時加查考儻一二年後學有成效卽調京考試授以官職俾有上進之階此事爲當今要務該將軍等務當實心辦理不得視爲具文儻將來日久無效惟該將軍等是問所有一切章程及薪貲工食各項經費著卽咨商李鴻章並參以總理衙門原議或酌提船鈔妥爲辦理議定後卽行具奏候旨裁定遵行前任湖北臬司裕麟據劉長佑等奏請畱粵差委會降旨允准茲據張亮基奏飭該臬司赴黔見在張亮基前赴貴州差委乏人亦係實情著晏端書卽飭裕麟兼程赴黔聽候張亮基差委俟貴州事畢仍回粵東毋許延緩將此由六百里

各諭令知之○丁亥諭議政王軍機大臣等都察院奏陝西候補參將盧殿標之妻盧馮氏抱告赴該衙門呈訴據稱髮逆撲富水關縣城被圍該處紳民送賊禮物伊夫會稟明署鎮閻丕敏候補道李祝齡該鎮道均置不問勝保查辦此案時委員雷正堂誣捏伊夫賄賊主謀候補道戴鸞翔有心鍛鍊增減供詞強令畫押等語賄賊通匪罪名出入甚重盧殿標是否實有主謀賄賊情事抑係雷正堂戴鸞翔等誣捏鍛鍊著多隆阿按照呈詞秉公查訊確情按律定擬具奏原摺原呈均著鈔給閱看將此諭令知之○諭耆齡奏援師克復永康武義兩縣詳細情形並東陽義烏浦江等縣踞賊逃遁一摺逆匪盤踞浙東各城並分股屯聚永康武義牽掣我軍自攻克湯溪龍游各城後復經林文察等將永康等城克復義烏浦江之賊俱渡江竄往杭州是浙東賊勢日漸窮蹙見在

耆齡已飭林文察康國器等率臺廣南康各勇由義烏東陽分路前進會合浙師埽蕩浙東卽著飭令派出各軍會同左宗棠所部將弁乘此聲威迅克紹郡進規杭嘉湖三府以靖全浙至賊匪時思旁竄其界連江西福建各隘口該督仍應處處兼顧前諭該督居中策應以仍駐浦城爲宜卽當遵旨酌量情形辦理勿稍疏虞將此由六百里諭令知之○戊子左宗棠奏龍游湯溪蘭谿金華等城經官軍攻克後金華敗賊由義烏竄赴諸暨粵賊譚星率蘭谿敗賊竄赴浦江臣飭蔣益澧分軍出武義永康義烏進剿劉典由浦江進剿合攻諸暨適據督臣調攻武義之總兵林文察署永康縣知縣程陶成馳報武義永康之賊於正月十三日同時遁走當將兩城克復東陽義烏之賊亦聞風向諸暨一帶潰竄劉典急率各營近逼浦江十八日劉璈黃少春等率所部馳至離城五十

里之白馬橋殺賊數百名當將縣城收復劉典卽飭各營乘勢偪攻諸暨黃少春等由牌頭以攻諸暨之南劉璈等由草塔以截賊出路該處民團一見官軍無不踴躍爭先願爲前導二十二日黃少春等督隊行至距城二十里地方出賊不意擊之擒斬數百賊敗入城官軍直抵城下城賊千餘驚慌無措遣人詣黃少春等軍前乞降黃少春等受之當將縣城收復見據各路稟報金華敗賊與首逆戴三竄赴諸暨後聞官軍將至復向義橋竄遁其意在回竄杭州諸暨逸匪聞已回竄紹興蓋自龍游湯溪蘭谿金華四堅城破後羣賊喪膽一聞官軍蹣跚追至卽奪路狂奔足無停趾惜前途無兵阻截未能聚而殲旃其粵賊譚星一股由浦江敗竄桐廬臣已飭蔣益澧一軍乘勢進攻紹興劉培元率所部水師會合魏喻義所部合擊桐廬之賊遏其西趨臣已移軍蘭谿俟將金華

等處布置稍定卽行親赴嚴州調度一切其劉典一軍仍須由嚴赴徽爲肅清皖南之計必俟皖南局勢漸定然後臣軍無後路之虞方可一意進取至督臣派來援勦之康國器一軍及閩粵各軍臣已函商督臣飭其暫駐東陽縉雲一帶以壯蔣益澧後路聲援

上諭議政王軍機大臣等前經疊次寄諭耆齡左宗棠以浙境軍聲丕振勢成破竹卽當進取紹興先復浙東並令耆齡仍應駐紮浦城以防賊復竄由皖南江西滋擾令左宗棠仍當分兵嚴州以清皖境而顧全局見在金華敗賊竄赴諸暨後聞官軍將至復向義橋遁走自係回竄杭州其諸暨逸匪已回竄紹興著左宗棠飭令蔣益澧之軍乘勢進攻痛殲醜類速復紹城粵賊譚星一股由浦江敗竄爲李秀城之黨所阻不敢回杭而竄桐廬卽著飭令劉培元迅率所部水師順流而下會同魏喻義所部合擊之以遏

西趨左宗棠見在移軍蘭谿擬俟金華等處布置稍定親赴嚴州調度其劉典等軍仍須由嚴赴徽肅清皖南俾左宗棠無後顧之虞方能一意進取所論甚合機宜著卽照所擬辦理昨據李鴻章等奏中外官軍進攻紹興法國兵官中槍陣亡洋將買忒勒繼之見當進攻紹興之際耆齡所派赴浙援剿之康國器一軍及閩粵各軍著卽飭令暫駐東陽縉雲一帶以壯蔣益澧後路聲援傳聞紹興已有克復之信各屬在事出力自可同膺懋賞又聞上年粵勇與洋兵構隙頗深自當豫爲防範毋令糅雜以致別滋事端並著該督撫密飭諸將與洋兵共事總須守禮示信勿許計功攘利致啟爭競之端且爲外國人所竊笑也紹城克復及籌定戰守各情仍著隨時速奏將此由六百里各諭令知之○諭潘鐸等奏東川解圍並攻勒巧家廳屬逆匪一摺髮逆由米糧壩等處過江入

川官兵分路追襲並於江岸截擊該逆不能竄渡折入巧家廳界復由碧谷壩等處竄踞那姑連日攻撲東川府城經兵練殲擒殆盡餘匪竄入川省會理州屬之窪烏等處勦辦尙爲安速見在川省兵勇俱集南路防堵該匪儻被川兵截擊難保不回竄滇境著潘鐸等督飭在事文武將毗連川境各要隘嚴密設防毋令逆蹤復行回竄至後股逆匪尙在巧家廳盤踞務當飭令知府黎新德等乘勝進剿並分兵截其渡江北竄之路毋令再行分竄將此由六百里各諭令知之○命寶璽等覆究刑部疏防反獄重案○諭官文等撥餉迅解左宗棠軍營○己丑僧格林沁國瑞奏查渦河迤北雖經收復多寨迤南雉河集尹家溝白龍廟等處卽係張落刑等老巢其餘捻圩尙復不少逆首張落刑猶思糾眾抗拒自正月中旬我軍移紮渦河北岸廟集偏近白龍廟劉狗等巢穴正擬

往攻詎該逆竄赴尹家溝與張落刑合夥該逆竄後其黨徐登濤等率眾來降卽將鄧樓張莊二處賊圩平毀遂於二月初一日派翼長舒通額等帶領馬隊馳往尹家溝掘濠樹柵以圖圍攻該逆乘我布置未齊率黨千餘人拌命撲出經我軍截殺多名該逆向西南逃遁我軍一面跟追一面就近進攻雉河集張落刑老巢該匪亦於是夜逃竄卽將雉河集尹家溝兩處賊巢全行平毀又宿州知州英翰等帶領擒首楊二卽楊瑞瑛王懷義龔耀來營投誠臣等思王懷義等旣降南路已通恐該逆張落刑等勢窮回竄卽派翼長全順等帶領馬隊前往花果集一帶探蹤勦捕初二日舒通額等至渦河迤南張村堡地方賊匪二三千名回拒舒通額等齊隊迎擊斃賊千餘名訊之擒賊供係擒首王廣一股前來援應張落刑者並訊悉張落刑一股已由該處向南奔竄離此已去三

十餘里等語舒通額等旋即整隊緊追初三日行至淝河北岸見該逆馬步三千餘名列仗以待經我軍吶喊衝去旋即四散逃走我軍分路追殺斃賊二千餘名逃竄無幾生擒擒首韓四萬程二老砍二名訊明就地正法初四日復帶隊尋張落刑等蹤迹至李莊擒首劉登瀛圩內將劉二老冤卽劉玉淵並伊弟劉四麻子張延生及窩匪之劉登瀛一併拏解到營訊明正法其擒首蘇添才卽立稜眼並伊義子賀繞兒等九名亦經全順等擒斬初五日晚間據英翰差弁面稟英翰正在石弓山一帶查辦投誠各寨旋有宿州蒙城交界之西洋集擒首李勤邦劉添詳頭號雷卽張慎德王瀾潮羅克有卽羅麻孜侯泳固等懇請投誠經該州許其歸正帶至大營再聽覈辦是夜李勤邦回寨後旋即遣人報稱逆首張落刑僅帶數人竄至該寨經李勤邦等將張落刑並伊子張禧及

伊義子王碗兒一併誘擒英翰得信後連夜帶隊馳往一面差弁稟請派撥馬隊護解臣等卽派馬隊前往提解到營親提審訊據張落刑供認曾受粵逆僞封率領各股擒匪盤踞蒙亳永宿一帶時到各處焚掠屢與官兵打仗屬實查張落刑叛逆昭彰賊中巨惡今幸仰賴聖主洪福將士用命使該逆勢蹙就擒實足以彰國法而快人心除將擒獲各股擒首由臣等隨時正法外惟張落刑一名係屬首逆並其子張濬等可否解送京師審訊辦理抑或卽由臣等就地正法請旨遵行初六日復有擒首孫臭卽孫蔡汶姜台凌俱各率眾來營乞降該二犯均與張落刑同惡相濟擾害最深見擬暫行看押並派兵前往該犯等所屬降眾各圩查明後再行斟酌辦理又據投誠之鄭如先報稱將逆首大老冤卽劉學淵誘擒當派參領祥恩帶兵前往押解到營訊明屬實當將該逆

犯凌遲處死前獲之擒首趙浩然亦卽飭署歸德鎮總兵成景等就近正法梟示查此次各股擒匪糾合圖竄經我軍連日跟追數日之內將首逆張落刑擒首大老冤二老冤劉四麻攷蘇添才張延生劉登瀛七犯擒獲又擒首王懷義姜台凌楊瑞瑛龔耀劉添詳羅麻攷張愼德卽頭號雷孫臭卽孫葵汶等八名均先後來營乞降其餘未獲之擒首蘇添幅仍飭各軍設法兜拏所有擒獲擒首張落刑之署宿州知州卽補知府英翰擬請賞加道銜李勤邦擬請賞加六品頂戴藍翎其餘幫同擒獲人等按照前懸賞格賞銀一萬兩以示鼓勵 上諭內閣巨擒張落刑曾受粵逆僞封擾害東豫江皖荼毒生靈罪惡貫盈豈容稍稽顯戮著僧格林沁卽將張落刑一犯在營極刑處死並其子張禧義子王碗兒一併正法傳首安徽河南山東等省被擾地方以申國法而快人心其餘

投降各擒著僧格林沁分別妥辦蒙亳一帶漸次肅清所有善後事宜著唐訓方慎選牧令招集流亡妥爲經理安徽蒙亳等處自遭捻患幾及十年田野荒蕪瘡痍滿目言念吾民殊堪矜惻著加恩蠲免錢漕二年以蘇民困僧格林沁銳意勦擒將積年巨患剋日掃除洵屬調度有方謀勇兼備著加恩仍以親王世襲罔替前奉 特旨賞用章服等項並仍准其服用以示優異侍郎國瑞隨同進剿亦屬著有微勞著交部從優議敘所有擒獲首逆之宿州知州英翰本日已簡放潁州府知府仍著賞加道銜投誠之李勤邦著賞給六品頂帶並賞戴藍翎其餘在事出力各員弁團勇著僧格林沁擇尤保奏用示鼓勵○僧格林沁國瑞奏前奉諭旨以直東股匪滋擾飭 臣 分兵援剿查 臣 等所統官軍見雖將首逆張落刑等擒獲擒首王懷義等數名來營乞降無如未經剿除者尙

有數股均應乘此聲威實力兜拏作一勞永逸之計況潁州府屬朱圩捻首朱花子及逆首張閔行等會合滋蔓急應督軍往剿其宿州孫疇一帶捻首李城雖經竄入山東而該處尙有捻首任弗得等股在彼抗拒總兵黃開榜帶兵圍攻日久未克亦應分兵剿辦以_臣等見有兵力實有難分之勢惟直東地近京畿不得不先其所急見擬派副都統恆齡帶領所部馬隊七百餘名馳赴直東合之前撥海羣所帶馬隊三百名共有千名足成一軍會合副都統成保等所帶馬隊由北而南實力剿辦可期得手惟各起馬隊連日追剿賊匪以致疲痠擬俟稍緩數日卽令啟程沿途仍應緩行以養馬力到彼便可相機會剿再此時皖北辦理清查撫恤各事宜最關緊要應請旨飭下唐訓方迅來蒙城以便_臣等與該署撫會商責令妥爲辦理上諭議政王軍機大臣等僧格林沁等

奏擒獲捻首情形並請派皖撫來蒙會商善後分兵直東合剿各一摺覽奏曷勝欣慰皖北軍務漸有就緒辦理甚屬得手該大臣業將劉大老冤等趙浩然趙欣然先後正法梟示所有張落刑及其子張濬等三犯卽著於軍前以極刑處死以儆兇頑而快人心在逃之該逆首家屬仍著嚴密緝拏毋任漏網至捻首王懷義姜台凌楊二卽楊瑞瑛龔耀劉添祥羅麻孜張慎德卽頭號雷孫吳卽孫葵汶等犯均係積年著名捻首屢經擾害本境及竄擾鄰省地方稔惡已久見因勢窮力竭始行投誠若遽准其免死不足以申國法而洩眾憤且狼子野心將來大營官兵撤退後難保不招集餘黨爲死灰復燃之計著僧格林沁酌量情罪輕重將積惡頭目速行正法以絕後患見在渦河南岸捻圩尙有若干額毫鹿邑及蒙宿一帶餘匪共若干股均著查明詳細具奏前由鹿邑竄向

柘城擒股雖經蘇克金等擊退而匪首孫醜劉尿等尙未擒獲該大臣務當督飭兵勇迅將該匪首等及未獲之蘇添幅等設法兜捕以靖閭閻其竄赴汝郡與陳大濬合夥之皖捻各股及潁郡宿州未盡餘匪均著該大臣次第剪除毋畱餘孽俟皖北肅清後再行親赴直東一帶剿捕該處賊匪副都統恆齡馬隊七百餘名見因連日追賊馬力疲乏著緩程前行俟到東省後會合海羣所部及前次直隸截畱之黑龍江布特哈官兵合隊進剿以資得力至皖北清查撫恤事宜必須地方大吏前往經理著唐訓方卽速馳赴蒙城一帶與僧格林沁會商妥爲辦理僧格林沁軍營將士勤勞日久未邀獎勵所有此次出力將弁兵勇卽著查明從優保奏以昭激勸僧格林沁摺聲敘蘇添幅等尙未拏獲而張落刑供詞則稱龔瞎仔蘇添幅等五犯均已殲斃是否確實並著查明具奏

將此由六百里各諭令知之○諭僧格林沁奏請派皖撫來蒙會商善後事宜一摺蒙亳一帶巨寇雖已殲除惟瘡痍未復人心未定唐訓方資望較淺恐尙不足以資鎮撫且臨淮一帶亦須有大員坐鎮前據官文等奏已咨催李續宜起程赴皖著李續宜懍遵前旨迅速馳赴安徽巡撫署任將軍務地方及善後各事宜妥籌辦理將此由六百里諭令知之○諭官文等奏竹谿尾賊遁竄防務緊要未能督師援陝並覆陳員外郎余上華請派重臣督辦三省邊防各摺片前因陝南興漢緊要諭令嚴樹森馳赴秦鄂交界督師進剿茲據奏稱盤踞竹谿之尾賊經道員梁作楫馳剿餘賊由關垭子等處竄往興安一路梁作楫一軍僅二千五百人越境過征難操勝算且恐賊蹤回竄進退維艱其穆正春周鳳山等軍扼紮黃州德安等處南禦髮逆東防皖捻疆事孔亟竟無一兵一

將堪以抽調隨征隻身前往無濟於事等語所籌自係實在情形
著卽飭梁作楫李雲麟兩軍嚴扼二竹鄖西兩路邊隘藉防爲勦
以遏該逆回竄之路如下游軍事稍鬆兵力足敷抽調該撫仍當
於陝南力籌兼顧無得稍分珍域本日據英傑奏興安府鎮雖經
收復該逆尙竄漢陰紫陽一帶窺伺漢中曹逆又由甯陝分竄盩
鄂藍逆久距洋縣伏莽甚多官文等摺內復有興安踞逆僞啟王
等圖竄川境之語是陝南軍事毫無頭緒嚴樹森又未能前往該
處並無得力兵將滋蔓堪虞前經疊諭駱秉章飭令駐紮川北之
周達武一軍越境馳剿卽著迅催該員督率所部就近入陝迅殄
賊氛其四川界連平利甑坪之城口大甯等處並著先行嚴密防
範以杜分竄至員外郎余上華所呈簡派大員督辦三省邊務之
處前已諭令官文駱秉章瑛傑等斟酌速奏見在官文等奏另設

大員督辦事關三省全局鄂省見堪膺斯選者川省軍務稍鬆正可先撥勁旅其如何合力會剿之處已咨商駱秉章等再行具奏並著官文嚴樹森駱秉章等迅速會議一面調派一面具奏免致稽遲將此由六百里各諭令知之○諭恩麟奏鹽茶平遠所首逆伏誅靈州等回眾投誠平涼漢回互殺回匪見踞瓦亭並固原被陷請處等摺片瑛棨奏回首連日撲城一摺及甯陝解圍曹逆分股圖犯藍鄂並請飭所調烏勒興阿等馬隊赴省助剿各片均經覽悉平涼見被賊匪圍攻瓦亭要隘被匪占踞若令久踞要地句結蔓延更將不可收拾此時張家川踞匪又復屢向華亭竄撲陝西鳳翔之賊亦時撲擾崇信地方甘省東路匪徒麇集所有恩麟由南路改調赴東之遊擊楊克成李友伏等兵見在自己趕到卽飭令護總兵呂元等督帶與署平涼府知府田壽增等聲勢聯

絡安籌戰守並嚴催署游擊周勝所部之官兵一千名星馳前往
仍遵前旨將延綏鎮及阿拉善等旗官兵迅速飛催到齊以資攻
剿熙麟恩麟身任地方責無旁貸務須督率各軍及地方文武保
全平涼速克瓦亭攻復固原毋任賊得久踞其張家川蓮花城賊
巢既據分飭道員林之望督率兵勇進攻隆德等處臬司楊炳鎰
馳往駐紮均著飭令安籌防剿甯夏平羅及鹽茶等處業經招降
仍令各該地方官妥爲安撫毋令再生反側並令署提督定安總
兵萬年新等將靈州等處北路嚴防陝省回匪撲擾省垣雖經擊
走難保不復行窺覷仍著馬德昭穆騰阿等分籌戰守毋稍疏虞
所調烏勒興阿常海馬隊著多隆阿迅催前赴西安以資守禦多
隆阿已連克王閣村羌白鎮賊巢諒倉頭鎮等亦必可卽克復當
此得手之際兵力斷未可以輕分該將軍惟當乘機進取此路勢

如破竹賊中駭悍自必奔救不違不但省城可免攻擾卽西連甘
省一帶回匪亦將不敢肆其稀突甯陝解圍川匪曹逆一股復欲
分竄盤鄂一帶該處近接省城且一出山口到處平原勦辦更屬
費手雷正綰專辦西路之賊著卽懷遵疊次諭旨妥籌兼顧並飭
張在德之軍擇要扼守臨潼縣城內畱防之驍騎校張德斌膽敢
爲回匪假稱苗練賺城情尤可惡據瑛棨奏業將張德斌正法梟
示惟此股回匪千餘人因城門不開向西北而去究竟逃往何處
務當飭令各地方官隨時防範張德斌何處旗弁並著查明具奏
將此由六百里各諭令知之尋奏回匪竄向西北歸入十三村一
帶老巢查無蹤迹至張德斌前供稱係京旗漢軍四甲庚寅佐領
下人報聞○庚寅諭議政王軍機大臣等多隆阿奏官軍進克王
閣村羌白鎮老巢詳細情形並續獲勝仗一摺同州一帶逆回以

王開村羌白鎮爲巢穴經多隆阿督軍攻克回逆自己喪膽惟官軍兵弁陣亡至三百餘名受傷者千餘名具見該將弁踴躍用命奮勇血戰而念其攻剿之苦欣喜之餘倍覺惻惻著多隆阿傳諭各營將弁宣布朝廷憫念之懷朝廷命將出師爲民拯命並不利其貲財所得財物著多隆阿隨時分賞兵弁以旌勞勩倉頭鎮援匪疊經擊退卽著乘破竹之勢迅速攻克第回逆兇悍異常屢經痛創猶復抵死抗拒該大臣身膺統帥爲國宣勞但能嚴明賞罰調度有方自可戰無不勝總當於奮勇之中常存保重之意用慰馳念雷正綰染患時疫勢不能赴鳳翔見在病勢已否輕減該營將弁是否不至傳染屢念實深著多隆阿傳知該提督卽在三原加意調攝一經痊愈卽行相機進剿副將王夢麟前經瑛榮派令帶兵援救鳳郡見在西安情形稍鬆著貴成瑛榮催令王夢麟迅

速前進如省城尙有可派之兵並著酌量添撥以厚兵力毋得株
守省垣稍涉推諉將此由五百里各諭令知之○惲世臨奏請將
田興恕畱楚帶勇 上切責不許仍令解川羈禁○辛卯諭議政
王軍機大臣等譚廷襄奏東昌剿匪獲勝請飭直隸官兵會剿暨
勦辦李城等股匪並羈縻宋憬詩各摺片張錫珠股匪經保德等
向燕店集一帶進剿斃賊千餘但馬賊尙多步賊聚散不定且賊
中並有粵逆陳玉城舊隊尤爲兇悍若不迅圖撲滅深恐賊勢日
張蔓延難制保德一軍兵力過單不敷攻剿見在寶山業經渡河
成保患病計已痊愈著崇厚催令該提督等調各隊渡河與東省
兵勇兩面夾擊合力截剿昨日崇厚奏報由臨清州拜發自係因
近防不如遠剿惟既有寶山成保等督兵出境崇厚總宜駐守直
隸邊境防賊回竄不可使本境邊防空虛致有疏失偕格林沁已

派恆齡帶馬隊七百名到東與海羣所帶馬隊合軍剿賊俟該副都統到時崇厚寶山成保譚廷襄各宜飭派出之兵與之會合將張錫珠股匪四面兜圍如再觀望定以軍法從事陳逆舊隊何時併入賊股賊首係何姓名著該前撫確查具奏李城股匪竄至新秦羊流店一帶敎匪繞竄新秦之谷裏等處幅匪亦出巢紛竄雖經兵團截殺惟無成隊之軍分頭攔截儻該匪合股徑犯泰安去省城不過一百餘里該處防守空虛實屬可虞若由東北直犯博山既係青州大路毫無阻遏尤恐與淄匪勾結所關更鉅德楞額節節逗留已諭令僧格林沁嚴行查催仍著譚廷襄催令整隊進剿毋許耽延並著檄令派出之焦其洲帶同充營前敵兵勇由閒道迎剿毋任賊匪紛竄鄒縣敎匪不時出巢兗郡一帶防兵無多恩錫業經接防著卽飭令嚴密防範毋稍大意宋憬詩與良團尋

仇雷鳳鳴雖隨同勦賊竟敢與楚勇鬪殺均屬跋扈程順書等前據該撫奏稱投入賊夥此次自訴迫於脅從並非安心爲賊若輩首鼠兩端實爲日後隱憂見今東省兵力未足譚廷襄止可於羈縻之中寓防範之意俟兵力可以勦辦必須盡數殲除方免後患將此由六百里各諭令知之○張之萬毛昶熙奏陳大窩糾約大股毫無竄至新蔡縣屬之李莊橋等處臣張之萬以平輿賊巢雖毀而汝陽縣屬之荒坡踞匪尙眾一經合夥勦辦更形棘手卽飭總兵張曜專辦此路以杜勾結正月二十五日該匪竄陷汝陽縣屬之史樓張曜督兵往勦乘夜克之二十八日陳大窩逆黨千餘名竄入汝陽縣屬之棗王寨張曜卽派遊擊南宮寶曾合兵練將該寨攻克二月初一日賊撲新蔡縣屬宋培基寨經遊擊周明崑擊退該匪率眾南竄其餘四萬等各捻未隨陳逆竄者均匿荒坡

寨內張曜於初五六等日親督馬步由汝境之張灣渡河伺之該寨突出馬步七八百名依寨抗拒我軍奮力壓退初七日賊傾巢而出復經我軍擊敗見卽環賊紮營相機攻取惟正陽東南賊寨及張岡寨內餘黨甚夥汝南埠一帶新撫各寨亦易搖動該匪圖援荒坡之計不行勢必南犯臣等先期派汝甯府知府劉成忠駐守正息交界之雷堰鎮撫各寨以王文行勇隊聽其調遣兼派主事余本初調集民團扼紮汝陽所屬寒凍寨以壯聲勢一面飛調余際昌一軍出賊之西探蹤迎擊臣毛昶熙亦令總兵趙鴻舉等帶兵遏賊南趨趙鴻舉派兵會同王文行渡河擊賊均有擒斬而正息交界之岳城土扶橋等處擒首鮑金潮等接應該匪由岳城一帶渡河直趨楊莊逼近雷堰初二日襲破雷堰西北馮余二寨並將汝南埠空寨占踞旋經該府劉成忠派兵奪回其正陽擒首

戴應華等率黨乘間突入張岡並聞魯店亦有賊黨潛回欲踞寨以應張岡兼絕官軍進剿之路臣毛昶熙得信飛調陳祿興移營魯店並飭趙鴻舉等就近策應初五日該匪復撲魯店趙鴻舉督同邵春仁等分兵往援陳祿興亦帶隊衝出內外夾擊斃賊數十名賊遂解圍而逸是日賊竄王家岡逼近寒凍主事余本初調集東路練長知縣李嘉謨等帶團巡哨斬馘七十餘名適余際昌一軍亦由寒凍渡河剿賊與賊遇於張岡之北殺賊甚多查張岡爲張鳳林舊巢其賊應華蕭汶信等又其死黨此時旣與陳逆合夥益以毫捻馬步萬餘勢必負隅張岡與南路土扶橋一帶賊巢聯絡一氣其西路就撫各寨人心未定尙存觀望一經勾結禍愈蔓延我軍步隊不能及賊之半馬隊不及賊三分之一眾寡懸殊難以力取見飭張曜仍率所部併力規取荒坡以防竄逸余際昌一

軍卽會同趙鴻舉陳祿興等連營環堵先斷西南各捻句結之路兼以鎮壓未叛各寨以守爲勦相機而動 上諭此股皖捻陳大常等經陳大澐句結竄至正陽所屬之張岡由新蔡一帶南竄沿途並未大受懲創雖賊眾兵單究屬追勦不力張之萬飭余際昌趙鴻舉等軍杜其句結南路土扶橋賊巢卽著嚴飭各軍伺隙進勦不可株守一隅致賊益無忌憚其陳逆餘黨竄入荒坡張曜業經前進卽飭迅速規取毋稍遲誤該總兵前因陳逆竄逃獲咎此時若不奮勉圖功必將重治其罪南陽與汝郡接壤淅川內鄉均係捻匪入陝之路著張之萬飭署南陽府顧嘉蘅督率民團於該郡廳縣一帶認真防勦毋令旁竄陝皖捻匪人數眾多陳大澐本屬渠魁復句結陳大常等各股恐正陽各軍未能迅圖掃蕩該處軍務甫有轉機新撫各寨人心未定若日久不能殲除必致蔓延

僧格林沁自擒獲張落刑後軍威遠振擒逆無不聞風畏懾雖毫
州距正陽較遠如由沈項一帶派撥得勝之軍進剿不過兼旬定
可奏功著該大臣酌量情形妥籌辦理該大臣派兵到後余際昌
等軍或不能堵禦任陳大禧等南竄定以軍法從事其僧格林沁
派兵未到之先仍著張之萬等督率各將弁嚴防毋得專待援軍
以致曠日持久貽誤事機再據譚廷襄奏李城股匪竄至新泰而
德楞額仍在莒沂之間並未尾追等語著僧格林沁嚴飭該已革
副都統迅速追剿並查明逗留不進各情嚴行參辦以肅軍律將
此由六百里各諭令知之○諭陝省逆回以王閣村等處爲巢穴
經多隆阿督率各軍將王閣村羌白鎮攻克賊膽已寒倉頭鎮計
可剋期掃蕩惟回巢已破該匪窮蹙無歸或繞赴北山或東渡黃
河均不可不豫爲防範德興阿一軍與其株守晉疆坐耗餉項不

如進紮同朝以壯多隆阿後路聲勢兼可就近截剿竄匪著英桂傳諭德興阿剋日渡河毋稍遲誤並著多隆阿斟酌同朝一帶情形何路緊要飭令前往駐紮該副都統係棄瑕錄用之員宜如何激發天良力圖報稱如敢意存玩泄賊至不擊賊去不追任令乘閒竄越貽誤戎機卽著多隆阿從嚴參辦捻首張落刑等業經僧格林沁督軍擒獲潁亳漸就肅清歸陳一帶亦漸臻安謐豫省西北無虞捻氛竄擾晉省茅津渡等處防務亦可稍鬆著英桂酌量抽撥該處在防兵勇調赴蒲州德興阿原駐河防處所擇要安營以資接替而重防務德興阿渡河以後英桂責無旁貸尤當督飭文武員弁嚴密戒備以固河防將此由六百里諭知多隆阿英桂並傳諭德興阿知之○諭奕梁等奏甯夏平羅各處回匪悔罪投誠一摺據稱甯夏縣屬之通昌通貴二堡回匪滋事竄入平羅地

方肆擾經知縣長謙等前往開導回曰馬仲元等遂自行背縛率眾投誠其甯郡南北各堡回匪經知縣彭慶章等勸導良回馬明起等亦將滋事之回曰馬奠國等設計誘殺呈繳軍械一律歸順等語該將軍等所奏係據參將塔斯杭阿等稟報大概情形入告其甯夏道侯雲登辦理無局迄今咨呈未到是塔斯杭阿等所稟恐尙不實不盡況該匪並未懲創何以卽行乞降儻藉詞緩兵徐圖反覆則爲患益大總之辦理此事不可草率從事著熙麟等督飭侯雲登等將勦撫事宜妥爲籌辦奕梁等仍當將存營官兵認真操練不得以回匪投誠稍形疏懈致墮賊計奕梁另片奏病勢日增請回京調理等語該處軍務未竣不可無大員督率操防奕梁俟慶煦到後方准交卸回京不得以印務交常陞接管遂謂可以卸責將此由六百里諭知奕梁常陞熙麟並傳諭恩麟知之○

壬辰加賞普濟堂功德林賑米二百石展期兩月○癸巳諭議政
王軍機大臣等崇厚等奏東匪由小灘過河西竄見籌堵截各摺
暨臬司王榕吉到營遵覆飭查王洛月等蹤迹各片崇厚等疊報
河岸設防濬濠並飭各軍分撥梭巡何以此次賊由娘娘廟等處
搶渡竟任其淌沙扒岸過河至千餘人之多姜國仲致被兜圍雖
經都司崔福泰等接應得解重圍而渡河之匪已竄至曲周西北
馬厰地方其爲姜國仲等疏於防範寶山並未親督所部截剿可
知如果河岸真有防兵自可及賊半渡奮力轟擊何至任賊扒渡
覓在賊之後股未能過河者亟應嚴加堵遏姜國仲等尤當知所
愧奮力贖前愆崇厚親臨河岸總當申嚴軍律續來股匪不准再
任竄渡其竄曲周馬厰是否過河之匪均在其中抑有分竄他處
不可不嚴密確探寶山摺報自肥鄉發已落賊後總兵徐廷楷知

府余承恩與成保春霖所帶各軍均已分路繞赴廣宗會合夾擊
卽著崇厚飛催各軍迎頭進剿以固北面之防如果後股不能續
渡前股曲周馬厰之賊僅止千人不難聚而殲旃能令此賊渡河
匹馬不還卽河東餘匪自然膽落不敢再思偷渡其河東之匪譚
廷襄已到東昌著卽嚴飭帶兵員弁乘機剿擊此次小灘搶渡之
賊東省兵練何以未見從後尾擊著譚廷襄嚴行查參恆齡已自
皖起程赴直並著崇厚飛速迎催以資統率王榕吉已到營著卽
飭令督率所部專意剿賊該員於地方情形較熟一切布置進止
崇厚可與之商籌定資得力其總辦軍需局務卽飭該員總其大
綱以爲兼顧王洛月已經更名隨同陳顯葵帶勇其弟王貫三王
貫四亦赴山東有無與匪偕長太句結及帶引東匪竄擾直境情
事著譚廷襄查明具奏並隨時嚴密訪拏毋任免脫小灘池南豫

東壤地相接仍著崇厚譚廷襄咨會張之萬豫籌堵截以杜分竄將此由六百里各諭令知之○諭本日已明降諭旨將寶山撤去提督署任令恆齡署理直隸提督據僧格林沁奏稱擬派副都統恆齡帶馬隊七百名馳赴直東會剿並令沿途緩行以養馬力見在賊已渡河擾及曲周畿南軍務緊要統領乏人恆齡歷經戰陣熟悉直東股匪情形著僧格林沁飭令該署提督迅速馳赴畿南接統各營馬隊並成保薩薩布海羣等幫同管帶以一事權而資攻剿毋稍延誤將此由六百里諭令知之○諭前據崇厚等奏稱張錫珠股匪由直隸回竄東境直境已無匪蹤見在該逆復又渡河竄至直東大名府屬一帶崇厚於防剿機宜絕無把握難期得力賊匪見在直東交界倏往倏來毫無攔阻若無知兵大員前往督辦畿疆重地何堪設想著劉長佑懷遵前旨迅速起程由海道

北上馳赴直隸總督新任以期迅掃逆氛劉長佑自調任直隸總督迄今已閱五旬尙未見該督起程殊深慮系並將由海道起程日期一面先行馳奏將此由六百里諭令知之尋奏於正月二十八日由海道起程北上報聞○諭馮子材等奏西南竄逆句結丹句逆匪下犯官兵迎擊獲勝各摺片鎮城爲瀕江要地此次逆首僞懷王等會合丹陽踞匪陳逆沿途築壘分黨鈔糧爲步步進逼之計經總兵張文德等分投追擊將牧馬口柏林村等逆壘焚毀陣斬匪首陳逆追賊直至丹陽城下洵足振軍威而褫賊魄惟僞懷王一股悉眾西遁難保不乘間思逞與丹陽各匪密圖報復馮子材等仍當激勵將士相機防剿毋得以賊鋒屢挫稍涉大意見在金陵賊勢日增上游九洑洲渡江之賊連日不絕鎮江江防關係緊要該提督等防守多年諒能斟酌機宜豫籌布置以副委任

也將此由六百里諭令知之○允英桂添調楚軍防回擒各匪○甲午諭議政王軍機大臣等唐訓方奏兵練收撫賊圩甚多宿境漸就肅清並馳赴蒙城與僧格林沁面商善後事宜各等語臨淮距蒙城不遠唐訓方此時諒與僧格林沁面晤所有善後事宜卽著妥商籌辦見在著名巨捻均已擒獲其餘零星股捻不難指日蕩平並著該大臣等會商應勦應撫各圩相機辦理蒙亳一帶久經兵燹民不聊生亟須循良之吏巡行勞徠招集流亡勸課農桑用蘇民困聞道員馬新貽在皖年久民情愛戴如能得力卽著該大臣等調往差委惟自下蔡以北苗沛霖所收各圩尙多見在該練雖不敢稍涉鴟張日久仍恐爲患應如何清理之處並著豫籌機宜以期一勞永逸其陳大常等股捻竄至豫省之正陽前諭僧格林沁派兵協勦是否業已前往卽著酌量辦理該大臣督軍院

豫以來已近一年衝鋒冒險夙夜宣勤此時夙志已償方擬令暫行休息而直東降眾張錫珠等股勢頗猖獗昨復竄越河西曲周等處畿輔重地豈可令其蔓延交界往來自如見在淮北零星捻股諒唐訓方督率各軍亦可次第辦理著僧格林沁酌量情形統帶馬步數千名先回直東將張錫珠等股悉數掃蕩成保寶山等恐未能迅速奏效諒該大臣公忠體國自能籌畫咸宜也將此由六百里各諭令知之○諭山西等省迅解甘肅軍餉○以恩麟爲刑部右侍郎由內閣學士遷○乙未諭議政王軍機大臣等譚廷襄奏捻棍各匪西竄充屬教匪潛襲民寨暨勦辦張錫珠股匪各摺片李城等由泰安西南竄入甯陽曲阜邊界教匪卽出巢襲破徐入寨嶧陽寨是該匪等聲息相通意圖勾結已可概見雖經德楞額跟蹤尾追總未能奮力兜擊遏其逆猷充營兵勇多不得力更無知

兵之將甯陽曲阜均係捻匪熟徑且密邇鄒縣匪巢與沂郡亦壤地相接一經勾結盤踞將數百里聯爲一片官軍更難著手前據譚廷襄奏稱教匪竄至新泰之谷裏等處此次又稱襲破嶧縣民寨是分股出巢其勢更張恩錫既接兗州之防並有該督撫畱防兵勇何至任令出竄毫無堵遏且該處兵少勇多恐有匪類潛迹其中若不急籌攻取貽患何窮德楞額見已趕到著卽催令督率兵勇會合恩錫所帶防兵並飭令焦其洲等軍探蹤夾擊分投進剿俾擒教各匪不至勾聯再行節節殲除廓清境張錫珠等分股搶渡河西南股仍在堂莘一帶仍著譚廷襄督飭保德統率各軍力圖掃蕩不得稍事鬆懈恆齡馬隊旣據僧格林沁咨會派令北來昨已有旨令恆齡署直隸提督著譚廷襄迅催該大臣飭令星馳北上與海軍馬隊合兵進擊並著迅飭保德等揮軍會合兜

勦迅殄逆氛知縣李靖前於張錫珠倡亂之始毫無覺察厥咎甚重見在飭令代理冠縣該前撫何以始終信任受其蒙蔽著訪查該員平日劣蹟迅卽撤任查辦毋令貽害地方將此由六百里諭令知之○諭多隆阿奏遵提謝開基等監禁並覆陳撫回情形及因病請假各摺片謝開基及伊子謝順既據多隆阿札交大荔縣監禁並行文湖北派員提解卽著照所議辦理俟湖北委員到陝卽令押解赴鄂照例懲處該大臣督軍勞苦徧體生瘡竟致不能騎乘實深廬念著賞假半月在營加意調治以資休息穆圖善傷痕漸愈而雷正綰病勢沉重尤所繫懷著卽傳知該提督安心調理用慰馳念多隆阿等儻假期已滿尙未痊愈仍可在營休養至回民應勦應撫朝廷本無成見該大臣職任統帥諒可隨機辦理無俟朝廷遠爲指示見在雖經給假一切調度機宜仍由該大臣

酌量辦理將此由六百里諭令知之○左宗棠奏浦江諸暨等城經劉典攻克後逆賊何汶罄率黨三千餘人由紹興竄至徑撲城下高連陞等馳抵諸暨縣城督隊迎擊斃賊三四百名餘賊仍向紹興一路逃竄官軍正擬移紮城外適東陽永康敗匪萬餘人紛紛竄至高連陞等合兵縱擊大敗之劉典復率各營追至應店街斃賊數百名首逆戴三因官軍追躡其後率黨由富陽西渡蔣益澧正飭劉清亮等規取紹興適接高連陞等稟稱紹興府城於正月二十六日經署提督葉炳忠等督率甯波諸軍收復賊由臨浦義橋渡江而遁其桐廬地方先有賊目賴姓踞守復添紹興敗匪萬餘於沿江修築石壘勢頗猖獗二十八日劉培元派水師副將楊政謨率三板師船駛往下游該逆見官軍無多悉眾來撲經楊政謨率隊奮擊燒毀賊船百餘號將沿江賊壘一律焚毀是夜楊

政謨會合魏喻義所部陸軍併力圍攻遂將桐廬縣城克復臣維
紹郡既克浙東一律肅清桐廬克復上游全爲我有劉典一軍追
賊已抵富陽縣境當杭州之西南距省城僅八十里蔣益澧所部
高連陞熊建益等已飭由臨浦義橋蕭山而前當杭州之南距省
城亦不過百餘里若遂乘勝長驅杭州糧少城孤似亦無難速克
惟粵逆譚星一股已由於潛昌化竄入皖南必將勾結太平石埭
諸賊擾我後路臣前奏劉典一軍仍須由嚴赴徽爲肅清皖南之
計正爲此也其黃呈忠等逆已由富陽渡江意在與首逆李秀城
合犯江北查杭嘉湖均爲李秀城分地紹城克則杭城危李逆或
以此暫輟北犯之謀亦未可定臣見飭蔣益澧率所部規取杭州
臣所部除分駐金華外均隨臣進紮嚴郡而催劉典一軍仍由諸
暨浦江回嚴州以漸向皖南其劉典回湘新募之勇計此時行過

章門臣已飛飭江西廣信府暫行截畱聽候劉典隨時調遣以固
江右之防劉典未回嚴州之先臣已檄劉培元前赴開化縣之馬
金街會合王德榜一軍相機截剿再由臣軍撥兵扼紮淳安縣港
口茶園以遏清途之衝一面檄飭各營勿貪克復省城之功勿憚
江皖迂阻之勢將來杭州克復皖南肅清臣擬籲懇 天恩勿論
會否克復省城總以殺賊之多寡爲勞績之高下一體錄敘以昭
獎勸庶人心競奮大局易就敕平所有克復各城尤爲出力之按
察使劉典等請旨分別給予獎敘以昭激勸又奏浙江此次之變
人物凋耗田土荒蕪見屆春耕之期民間農器毀棄殆盡耕牛百
無一存籽種無從購覓殘黎喘息僅屬朝不保暮臣於去冬會籌
補救十二條刊發各屬見復籌採買籽種購辦耕牛招集鄰省農
民來浙耕種冀將來或有生之望惟浙省被難地方極廣富紳

早已遠徙臣軍所過地方每與臣領各官分散錢米暫救目前然
涓滴之施無裨大局見飭浙省徙居廬上各富紳速措巨款廣購
米石運浙辦賑以救阡危而資撫卹江西巡撫沈葆楨奏臣疊據
各路探報浙東敗逆從於潛昌化竄入績溪並句結太平大股聚
於石埭方西趨之勢建德爲之震動其後路蔓延昌化之冷水
埠車盤嶺等處以窺淳遂查淳遂一帶已據左宗棠分兵駐紮並
派臬司劉典援徽江西廣信一路可以無虞惟該逆若橫竄建德
則與饒九處處接壤臣當飛飭段起等嚴扼景鎮王定國嚴扼湖
口韓進春偵賊所向迎頭截擊如韓進春拔營勦賊屈蟠卽由貴
溪進紮樂平以聯聲勢而固門戶上諭前因浙東軍務得手杭
城不難攻復第取之雖易守之甚難不如先清皖南勦辦較易得
手曾經諭令曾國藩左宗棠妥籌辦理此次左宗棠摺內所陳乘

勝長驅杭城無難速克惟逆首譚星一股已由於潛昌化竄入皖南必將句結太平石埭諸賊擾我後路僞王黃呈忠等聞已由富陽渡江與李秀城合勢北犯見飭蔣益澧規取杭州而催劉典一軍回嚴以向皖南並飭劉培元率所部三營前赴開化會合王德榜全軍相機截剿又分撥八營扼紫淖遂之衝各等語所籌與前旨大略脗合卽著照所議妥爲辦理至檄飭各營勿貪克復省城之績勿憚江皖迂阻之勞將來總以殺賊多寡爲勞績之高下尤屬洞中窾要並著隨時策勵各軍迅奏膚功同膺懋賞見在浙東敗賊竄入績溪並句結大股聚於石埭意圖西趨劉典一軍旣已赴徽援剿江西廣信尙可無虞惟該逆若橫竄建德則與饒九處處接壤不可不豫爲之防沈葆楨已飭段起等嚴扼景鎮湖口並令韓進春偵賊所向迎頭截擊卽著督飭該員等嚴密防剿毋稍

疏虞浙江此次之變吾民顛沛流離千里赤地朝廷軫懷民瘼哀憫殊深左宗棠見擬散錢煮粥拯救飢民招集流亡給貲耕種具見該撫能體朝廷德意惠我烝黎而富紳楊坊俞斌毛象賢等十數員非但膜視邦族不加拯恤且欲乘機賤置產業實屬忍心害理爲富不仁著照所擬飭令力措巨款廣購米石迅救阡危如敢不遵卽行嚴辦將此由六百里各諭令知之○諭徐宗幹奏臺灣各路官軍疊獲勝仗並內地援師抵郡會剿一摺臺匪久踞彰城攻陷斗六分撲嘉城臺灣道洪毓琛等派撥義首李成龍等由鹽水港進剿北路其另股分撲嘉城之賊亦經參將湯得陞等先後擊退保全嘉城是臺境軍情已有轉機彰城踞匪無多吳鴻源見已統領全軍抵臺軍威益振卽著耆齡徐宗幹督飭該署提督等會合曾玉明洪毓琛水陸各軍聯絡一氣迅將彰城斗六攻克肅

清臺境逆首戴萬生遁入番社賊黨難保不恣他竄並著迅速拏獲以清後患本日據左宗棠奏紹興克復浙東已就肅清閩防稍松如臺境兵力不敷卽著耆齡等酌撥兵勇前往以便及早廓清臺境刻下各路援師赴臺一切軍火糧餉卽著洪毓琛悉心妥籌辦濟毋稍貽誤將此由六百里諭知耆齡徐宗幹並傳諭洪毓琛知之○丙申譚廷襄奏查長城爲郊境著名匪寨周圍六七里悍賊劉兆青等麇聚其中稔惡已久見經黃國瑞督同將弁並郊城縣知縣周士溥調團協助先於圩外開挖長濠並填塹築牆將該寨攻破髮棍各匪擒斬殆盡洵足以伸天討而快人心臣前與黃國瑞往返籌商攻克長城後進取之方該總兵奮發有爲銳意以滅賊自任惟慮兵力單薄懇請添選勇丁次第掃蕩臣通盤籌畫沂屬匪勢日橫本省官兵到處分撥不能注以全力黃國瑞勦

賊有效卽當用其所長已許以每月由東省添助萬金以兩三月爲期務殲醜類見在長城旣克郊境西哨等寨先經分別剿撫卽蘭費各匪亦必震懾軍威第充沂匪巢以鳳凰山爲最巨蘭山之作子圩成泉山仲村車輞費縣之岐旺二山及寶泉峒等處次之教匪近日潛襲嶧山民寨希圖梗塞大道窺伺前敵營盤充營兵力已單不敷分布而李城等匪又竄入甯陽邊界雖經德楞額等在後追剿並由臣調充營遊擊焦其洲等軍馳往夾擊惟賊勢將與教匪勾合在在可虞黃國瑞部將猛鷲善戰甚爲出力若能移軍赴充或由費縣進攻寶泉峒先翦教匪羽翼卽由鳳凰山東南紮營充軍由西南而進可望得手教匪旣破則蘭費餘匪自然瓦解臣已函令黃國瑞酌度具覆一面乘勝移師西進以期迅就廓清上諭議政王軍機大臣等據崇厚奏賊竄西北截往東路請

將追賊遲延之副都統議處及自請嚴議一摺賊匪乘閒過河竄至曲周縣境後復經余承恩等軍擊之於雞澤之司徒堡王榕吉所部擊之於隆平之坵底村賊始折而東竄成保追賊遲延經崇厚屢次督催始帶馬隊跟隨步隊而行實屬畏葸不前成保著暫行革職責令畱營帶隊自效崇厚督催不力亦難辭咎著交部嚴加議處見在總兵徐廷楷及姜國仲余承恩等均已趕過隆平仍著崇厚嚴飭奮勇追剿嚴防北路成保經此次薄懲如再不能奮勇前驅轉以剽悍之賊專委之於各步隊以致節節落後坐誤事機試問該革副都統與該署督能當此重咎耶昨經寄諭僧格林沁令其酌量情形統帶馬步數千名先回直東掃蕩張錫珠股匪見在此匪駸駸北竄成保寶山均不能得力直省軍情尤爲緊切卽著僧格林沁將蒙亳等處善後事宜一切悉遵前旨與唐訓方

面爲交代迅卽統帶馬步各隊馳回北路將直東之賊迅速埽除並著將籌定布置及何日可以起行之處先行馳奏以慰懸盼恆齡所統馬隊七百名不日可抵直境著僧格林沁飛催前進崇厚並派員先行迎提到後卽可合力夾剿崇厚原摺著鈔給僧格林沁閱看正在寄諭閒譚廷襄奏攻克長城賊圩及攻擊淄川踞匪情形等摺片長城爲郊境著名匪寨黃國瑞與知縣周士溥埽穴擒渠辦理尙爲得手譚廷襄所奏與黃國瑞籌定攻克長城後進取之方以鳳凰山爲最要蘭山之作子圩及寶泉崗等處次之近日教匪潛襲嶧山民寨希圖梗塞大道窺伺前敵營盤李城等匪又竄入甯陽雖經德楞額等從後追剿並由譚廷襄調令遊擊焦其洲等各軍馳往夾擊而賊勢一與教匪勾合更將延蔓黃國瑞之軍當令赴兗進剿先由費縣攻克寶泉崗後卽由鳳凰山東南

紮營與兗軍西北會合夾擊敎匪一經破滅則蘭費餘匪均當瓦解所籌尙合機宜卽照所擬著譚廷襄每月由東省添助黃國瑞軍餉一萬兩以兩三月爲期務令悉殲羣醜仍將郊境西哨等寨乘勢分別剿撫並遵前旨催督德楞額及焦其洲等軍將李城等匪奮力兜擊毋許稍涉遷延觀望其淄川踞匪負隅已久譚廷襄奏稱近日進攻疊有斬獲賊之精銳僅餘數百又將最爲驍悍之賊目姬魁擊斃其勢甚窮卽著督飭總兵會逢年等剋日將淄川縣城攻克不准再事遲延黃國瑞進止機宜並著譚廷襄會商吳棠妥籌迅辦毋得輒以空言塞責將此由六百里各諭令知之○諭本日據崇厚奏報東匪乘閒過河已由曲周竄至平鄉直隸軍情緊要劉長佑行抵津沽卽著董恂探明傳旨令其毋庸來京卽由天津迅速前往崇厚軍營接直隸總督之任辦理軍務以資得

力並著將到津及赴營日期速卽奏來以慰殷盼將此由六百里諭令知之○諭毛震壽奏遵覆漢南軍務情形自請嚴議並請飭駱秉章迅催張由庚等軍赴陝援剿各摺片見在藍逆仍踞洋縣興安竄匪欲由紫陽漢陰一帶窺伺漢中曹逆又由甯陝圖竄整鄔張逆回踞寶山老巢伏莽甚眾儻致勾結蔓延勦辦愈形棘手駱秉章前派分駐綏定之張由庚周達武兩軍距陝較近卽著迅飭由城口太平等處星馳赴援與易佩紳等軍聯絡聲勢合力防勦務將洋縣寶山等處踞匪次第殲除以靖地方毛震壽仍當督率所部與川省官軍會合夾擊力圖勦賊以贖前愆毋得藉口兵單餉絀坐待援師致賊勢更形滋蔓儻再遷延畏葸致誤戎機恐毛震壽不能當此重咎也將此由六百里諭令知之○諭劉長佑奏新甯縣東西兩路客家勾結匪類突入廣海寨挾仇焚殺見派

文武大員馳往查辦並籌辦肇慶府屬土客互鬪請將知縣陶鑾
先行議處各摺片上年廣東恩平開平各縣土著將赤水鄉攻破
本年正月客眾竄擾西村雙門臨田大洋等各土鄉復撲入廣海
寨肆行殺戮遊擊黃連安等不知下落經劉長佑與晏端書等會
商派令臬司吳昌壽副將衛佐邦帶兵赴新甯勦辦所籌尙妥劉
長佑見由海道來直著晏端書責令該臬司等相機妥辦設法解
散儻敢恃眾抗拒卽行痛加勦洗該寨文武下落並著查明具奏
高廉道英秀由省赴任爲恩平客民攔截擁護到鄉求爲申雪經
都司塔清阿等開導始行送出其中情節恐有不實不盡著催令
總兵陳佐光速回陽江縣城趕緊籌攻務將織簣各鄉踞匪剋日
掃蕩以清道路英秀被阻情形仍著查明具奏所失餉銀若干責
令朱維城等迅追清款不准短缺代理恩平縣事陶鑾於地方匪

徒漫無覺察致令大員被匪邀截餉銀遺失實屬疏忽著交部先行議處廣東土客互鬪歷有年所此次復敢踞寨焚殺截畱大員明目張膽啓不畏法若不趕緊殲除必致釀成巨患晏端書身任兼圻責無旁貸務當督飭在事各員認真勦辦毋稍玩忽劉長佑另片奏法國領事李添嘉請撥兵教練情詞急迫該督與晏端書等籌商已在旗營酌撥官兵會同法國派來弁兵一體練習等語法國以英國爲中國教練官兵亦願派兵教練原無他意惟外國人性愛體面若有畸輕畸重之處恐不免別滋口實著晏端書一切持平辦理所有應支薪糧等項務須查照辦理英國教練官兵成案畫一辦理並著隨時查察勿致有名無實是爲至要將此由六百里諭令知之○諭毛鴻賓奏遵籌緩急情形請旨調派一摺江忠義一軍原爲會國藩指訓疊經諭令毛鴻賓催其赴皖嗣因

廣西蓮塘踞匪正資勦辦復諭毛鴻賓飭赴粵省並令江忠義署理廣西提督以專責成及蓮塘攻克尙恐餘匪未淨潯屬賊股尙多又諭毛鴻賓通籌緩急其江忠義一軍應令赴粵赴皖酌度情形具奏茲據奏稱蓮塘克後江忠義舊部已次第拔回新甯廣西潯州股匪有劉坤一易元泰兩軍會勦不至旁竄而皖省軍情緊要會國藩等亟盼江忠義提軍前往共支危局江忠義著仍遵前旨馳赴皖省並著會國藩妥爲調度何路緊要卽派往何處以資得力其廣西提督著張凱嵩酌派得力之員奏明署理潯州軍事劉坤一接辦後能否得手張凱嵩身任疆圻責無旁貸卽督飭劉坤一易元泰等實力埽蕩毋許延玩將此由六百里各諭令知之

○諭滿慶等奏請揀員督領番眾勦辦瞻逆破格錄用糧員由川撥運火藥餉銀各摺片瞻對逆匪久圍裏塘梗塞驛路該酋工布

朗結復令期美工布大股逆賊行抵三壩地方劫去糧員行李搶奪由藏發出招報公文其格吉地方亦有告急夷信該逆前於道光年間滋事前任川督琦善帶兵往辦並未力攻僅以敷衍了事以致該逆毫無畏懼將附近各土司任意蠶食見在川藏商賈不通兵餉轉運維艱漢番均有饑饉之虞若巴塘再爲吞併則江卡亦難堅守自應力籌攻剿以靖逆氛滿慶等見今派委番員徵兵借餉並約會三十九族調集各處土兵防剿瞻逆西北兩面其東南兩面必須川省派員調集土兵四路進攻方可收事半功倍之效該逆勢甚鴟張非口舌曉諭所能了事駱秉章見派道員史致康督飭打箭鑪及裏巴二臺文武各員辦理著卽迅飭該員星夜前往並督同明正土司及大小金川等處土兵約會藏中委員四路夾擊並添派得力知兵大員前往督剿以期迅行掃除糧員李

王圖既據滿慶等奏稱督辦剿撫瞻逆軍務才可勝任卽著責令該員統率西路漢番官員及番土各兵前往乍丫察木多一帶與川中委員會合攻剿將來如有成效自可量予恩施此時未便遽行超擢諸們罕汪曲結布於征勦事宜既經熟悉卽著滿慶等飭令在藏坐辦與李玉圖遙爲籌商至藏中調集各處土兵已有一萬三百餘名之多止能備辦四箇月口糧該處庫款既竭火藥鉛丸尤缺亟須川中接濟著駱秉章速撥餉銀四五萬兩並火藥三四萬斤酌帶鉛彈派員由會理州繞道滇省之維西廳至藏巴交界之南墩或至察木多所屬之擦瓦岡地方相繼前進毋得稍稽時日至藏地西南兩面及西北界外各部落已多歸附披楞廓爾喀又屢爲披楞助兵侵占各處土地所有撫綏番眾以廣招徠毋令再爲披楞誘惑之處著滿慶等會同妥商辦理其藏中邊備更

宜豫爲籌畫滿慶等務當咨會駱秉章速將贍對股匪先行勦除
以清內患仍一面畱意邊防嚴申警備毋稍大意糧員李玉圃參
案既據滿慶等奏稱係川中委員捏稟該督所致著福濟景紋卽
行繞道迅速赴藏遵照前奉諭旨查明辦理並著景紋將地方軍
務於抵任後妥行籌辦將此由六百里各諭令知之○以督勦不
力陝西布政使毛震壽下部嚴議○丁酉予山東被戕縣丞沈兆
勳祭葬世職○庚子諭議政王軍機大臣等劉長佑奏由粵抵津
由津定期赴營各一摺並自陳籌兵籌餉各片均經覽悉劉長佑
聞命北上卽日前赴軍營甚慰盼懷直隸大順廣所屬地方前因
降匪張錫珠等爲亂冀州南宮等各州縣橫被蹂踐入春以後疊
經崇厚奏報各軍分投堵剿該匪已由臨清渡河竄過東境本月
望後復由小灘等處襲渡河岸竄擾曲周平鄉甯晉等縣境節據

崇厚奏報賊復渡河馬隊千人嗣復沿路裹脅步賊二三千名之多雖據聲稱見飭馬步各軍趕過甯晉向東南追剿殊恐此賊未經痛剿所至又復蔓延畿南密邇京師北路之防尤要第僅將賊驅逐出境直東交界地方平行運河一衣帶水窵濠築壘亦難恃以爲固賊蹤往來剽疾必得痛加剿洗迅將全股殄滅方足以儆兇頑而靖畿輔劉長佑久歷戎行聲威頗著到營後察看賊情地勢將直省見有馬步各軍將及萬人申之軍律布以方略定能所向有功該督所奏治兵籌餉其源皆出於察吏洵爲探本之論直隸吏治廢弛清釐整飭自當積漸爲之不求速效不恤人言方能有所裨益該督到任總當盡其心力慎毋有所顧慮致多牽掣朝廷亦斷不爲一切遙制也見在直隸軍營已有吉林黑龍江馬隊合五百名署提督恆齡所帶馬隊七百名又有由京派出成保薩

薩布所帶京旗馬隊統計爲數不少該督所擬派撥吉林黑龍江及蒙古馬隊自可毋庸再調僧格林沁剿辦毫捻已將張落刑等巨逆擒戮殆盡昨已飭令酌帶馬步各隊北來先剿直東之賊儻能迅至更可商同剿辦山東臨清一帶節經譚廷襄奏聞派兵調團堵剿應如何設法兜擊隨時知照譚廷襄併力辦理其宋憬詩等降眾前經崇厚譚廷襄請令隨同剿賊自效誠恐狼子野心仍懷反側此時雖在東境與直省軍營聲息相通著劉長佑到營後悉心體察並酌量應剿應撫抑應暫爲羈縻如何控御之處妥爲籌定具奏辦理將此由五百里諭令知之尋奏宋憬詩等降眾擬仍暫爲羈縻以孤賊勢而紓兵力報聞○諭李續宜奏定期起程赴皖並請開缺專辦軍務一招李續宜假期已滿因父病未愈請寬限二十日於三月初十日起程著卽迅速起程赴皖該省軍情

自僧格林沁擒獲逆首張落刑後近雖尙稱平穩惟和含等城踞匪時圖由皖竄楚以牽掣金陵後路援師防務仍形喫重其淮北零星股匪仍須次第剿除至下蔡以北苗練所收各圩尙多雖不敢鴟張恐該練日久生心復形反側一切籌辦淮防駕馭苗練亟須李續宜相機妥辦諒該署撫必見及此不至稍涉延緩也至軍務與地方應辦事宜必須聯爲一氣始能收臂指之功李續宜請開皖撫之缺專辦軍務誠恐事權分屬或致呼應不靈於軍務地方轉無裨益李續宜惟當身任其難力圖報稱以副委任毋庸固請開缺將此由五百里諭令知之○諭多隆阿奏起獲賊賊充餉見在籌辦情形並甘回不可輕撫穆騰阿奏請飭司道籌濟軍食並調回西安馬隊各摺片多隆阿一軍自去冬赴陝至今已閱五月僅收到湖北山西直隸協餉銀兩陝西河南山東等省協款尙

未接到分釐以致該營五月以來僅發一月之餉情形十分竭蹶見經各營兵勇在王閣村撥出窖銀二十一萬三千有零由多隆阿運回封存即將此項支發月餉作正開銷具見該大臣辦事認真著卽照所議辦理前因該大臣攻拔王閣村羗白鎮回逆老巢移軍進取倉頭恐同州一帶空虛特經諭令德興阿督帶所部由蒲州渡河進駐同郡爲大軍後路聲援該大臣見辦情形與朝廷前降諭旨適相符合著卽飭令德興阿遵奉前旨迅速移軍同州以資防堵至甘肅鹽茶廳等處回眾曾將滋事首要各犯捆獻投誠尙可准其悔罪自新若固原回匪因該地方有招撫之議竟乘官民不備襲陷州城致居民慘遭荼毒非痛加剿洗不足以儆兇頑而申國法據多隆阿奏甘省又有議撫之說請飭該督慎重辦理著熙麟恩麟轉飭在事文武審度機宜不可輕行議撫其業經

就撫各回眾仍著隨時防範不可稍涉大意西安駐防官兵月餉
瑛榮欲自二月起每月改以二成實銀給發又欲將月需兵米僅
給二升五合不敷米豆折價發給不足以資餬口該處城垣均賴
駐防旗兵登陴固守豈能責令枵腹荷戈該撫於回匪起事之初
並未飭令司道豫儲倉庫致令城中坐困日久兵餉無出因循玩
誤實堪痛恨著卽督飭該藩司糧道設法籌畫務將駐防兵餉仍
按四成實銀發給米糧折半六斗不敷米豆折價支放以濟急需
儻仍前膜視致令飢軍譁潰恐該撫及司道等不能當此重咎也
省垣城大兵單防兵二千不敷分布穆騰阿見擬將雷正綰軍營
派援鄆縣之馬隊二百八十餘員名及防守北關營盤兵丁二百
名一併撤令歸伍分撥守陴惟鄆縣一帶亦須兼顧著會商多隆
阿瑛榮酌度情形辦理山東軍務正當喫緊所有該處軍營之西

安馬隊斷難撤回歸伍穆騰阿務當督飭見有兵力妥爲防剿毋稍疏忽將此由六百里諭知多隆阿穆騰阿熙麟瑛榮並傳諭恩麟知之○諭前因黔省官民擅殺教民一案必須持平辦理特賞給勞崇光頭品頂帶馳往查辦並諭令張亮基以總督銜署理貴州巡撫兼署貴州提督於到黔後時將明發諭旨宣示會同崇實勞崇光將此案迅速妥辦茲據崇實奏疊奉寄諭密陳籌辦情形請先聲明何冠英田興恕之罪宣示中外再命廷臣嚴議罪案並先將韓超交部議處以存國體而服遠人各等語所奏不爲無見何冠英雖獨創異議係屬已故之員且據該教民鈔呈何冠英等辦理教民信函內係與田興恕聯銜若專坐何冠英之罪該公使等恐難允從至田興恕不遵諭旨離黔日形跋扈殊干法紀卽從嚴懲辦亦不得謂非情法之平惟案內關涉教民必須中外均無

異議方可施行張亮基已自成都起程二月內可抵黔省著俟到黔時即將前寄諭旨宣示一面遵照前旨催令田興恕起程赴川解其兵柄其前此錄寄田興恕被參各款並著一面查明會同勞崇光崇實覆奏屆時再降諭旨宣示田興恕之罪較之憑空結撰者差勝如田興恕仍敢抗違是其跋扈不臣萬難寬貸卽著張亮基傳旨革職拏問嚴行審訊至教民案件如何完結能否不至抵償之處崇實張亮基仍應先行定擬具奏不得專候總理各國事務衙門之信韓超欲以此事專罪戴鹿芝一人難免非受田興恕挾制斷不可行崇實所請將韓超先行交議之處著一併俟張亮基等奏到時再降諭旨張亮基奉到此旨務須愼密俟勞崇光到時酌覈情勢會商妥辦崇實摺著鈔給閱看將此由六百里各密諭知之○辛丑諭內閣吏部奏戶部郎中員缺聲明請旨一摺戶

部候補郎中王正誼係發往河南差委之員其於該部郎中缺出應否擬補自有定章即使原定章程內有未經議及之處不妨將章程詳加酌議奏明辦理若似此等尋常事件動輒請旨亦安用設有專司銓選之吏部爲耶此摺著吏部再行覆議具奏○壬寅諭內閣御史劉毓楠奏附祀兩廡新章尙未允協請飭大學士軍機大臣再行覆議一摺先儒升祔學宮久經列聖論定至爲精當咸豐十年復經文宗顯皇帝飭令酌定章程以示限制原以宮牆巍峻祀典至崇必其人學術精純足爲師表者方可俎豆馨香用昭勿替茲據該御史以新定章程過嚴如宋儒黃震等均經禮部議駁謂士人皆以聖賢爲難幾必致人心風俗日流於奇袤異端而不及覺推該御史之意必將舉古人之聚徒講學著有性理等書者悉登諸兩廡之列方足以資興起而德行之儒平日躬

行實踐師法聖賢實爲身後從祀之計議論殊屬迂謬所奏著毋庸議○張之萬毛昶熙奏陳逆於二月初八日率領毫捻由正陽之銅鍾一帶避兵南走其張中與林振山戴應華等股仍畱張岡並分踞旁近之楊寨等處互相犄角爲牽掣我軍之術臣等飛檄總兵余際昌率所部卽日南行追賊並飭副將陳祿興一軍先紮魯店將寨內賊匪剿盡卽令就近規取張岡總兵趙鴻舉帶領蔣東才等分攻附近賊寨兼爲各路策應初九日余際昌督率全部馳紮銅鍾探知該匪已竄土扶橋霍光玉寨卽於是日先率馬隊進剿斬馘多名該匪於夜間逃遁初十日竄至息縣西界龐家灣渡河而南經署知縣劉鴻昌等督率勇練半渡擊之殺賊數十名淹斃無算其前股折回龐家灣會合後股南竄羅山竹竿鋪復經知縣賀錫福截殺多名賊由該縣河口集等處遁入光山縣境十

一日余際昌帶隊馳抵光山之曹黃嶺進紮縣境八里岔次日該總兵親率各營馬隊由中路疾馳進剿令副將李殿元督率各營步隊分左右兩路同時併進追賊至吳楮店將賊騎橫衝兩段我軍步隊趕到復將後股馬賊截殺無數前股散匪經馬隊追剿至光山五里河再戰再捷斬溺約千餘名該逆竄至縣南之白雀園一帶復經余際昌督催馬步緊追躡剿其張岡股匪十三日率眾出竄當經副將陳祿興等迎擊斬殺甚夥餘匪遁入楊寨十六日總兵趙鴻舉等率兵進攻忽張岡賊眾來援我軍分兵迎擊斬殺六百餘名陳祿興王文行等乘夜自領捷勇越濠進攻該逆不支向東奔竄經陳祿興等截殺殆盡立將楊寨克復臣等見已嚴飭余際昌乘勝銳進務將該匪全股殄滅惟白雀園南通楚疆東達商固楚省沿邊一帶均有防兵固始三河尖地方亦有皖省官軍

駐紮係提督成大吉所帶若楚皖各軍越境助剿必能聚而殲旃

張之萬見已飛咨楚皖督撫就近派軍會合豫師四面兜剿仍

嚴飭豫軍併銳急追其張岡踞賊由

臣

毛昶熙親督趙鴻舉等各

軍相機攻剿埽除伏莽以慰 聖廕又奏二月初七日曹窯馬寨

各捻圖竄項城經參將張士元等帶隊截回初八日會練進攻曹

窯直抵寨邊填濠銳進該匪負隅固守矢石雨下馬寨之賊復突

出援應經馬策勦奮勇擊退捻斬數名時張曜進偏荒坡以附近

之胡寨捻首時莼一隨陳逆南竄當卽襲破其寨初十一等日

張曜督軍進偏荒坡攻擊甚力賊勢窮蹙張曜復密令練長劉傳

倫潛約寨民乘機內應十二日我軍乘夜往攻縱火焚燒煙燄四

起賊眾大亂寨民乘亂開門張曜親督各軍齊進斃賊無數餘賊

越牆而逸復經副將保英截殺殆盡是日張士元等進攻曹窯亦

令軍士乘風縱火並將各隊環紮東西北三面而於南面令遊擊程之偉等設伏待之賊果開南門奔竄張士元等蹙其後程之偉等截其前擒斬甚眾當將曹窰攻克見飭張曜等激勵兵勇乘勝將新項境內賊寨節節掃蕩以清伏莽 上諭議政王軍機大臣等陳逆糾合毫捻由銅鐘一帶南竄經余際昌等督率馬隊疾馳進剿追至光山所屬吳褚店等處斃賊甚多該匪竄至縣南之白茱園一帶著張之萬速飭余際昌跟蹤追躡會同楚境防兵併力兜剿務將此股竄匪悉數殲除以杜後患楊寨雖經克復而捻匪張中與林振山戴應華等尙敢踞守張岡負隅抗拒著毛昶熙親督趙鴻舉陳祿興等剋期攻拔毋任久踞如該總兵等攻剿不力致該匪乘間他竄卽著從嚴參辦張曜督軍進徧荒坡攻剿甚力寨民內應開門張曜督率各隊一擁而進殲賊無數乘勝克復曹

案勦辦頗屬得手著張之萬仍飭張曜等激勵兵勇迅將新項境內各賊寨節節掃蕩並將首惡陳大禧殲除以清伏莽土匪支文炳業經該地方官訪獲正法惟臨漳內黃毗連畿輔見在張錫珠股匪尙未殄滅彰屬餘匪尙多恐不免聞風思逞仍著張之萬督飭所屬嚴密梭查毋畱遺孽張錫珠等竄渡河西豫境防範不可稍鬆並著飭令楊長春會同地方文武員弁認真偵探如該匪竄近豫疆卽迎頭截勦毋得稍涉大意本日有人奏降補道員金國琛爲守兼優將略實能獨當一面賊擾安陸由穆正春在河口不能振截所致乃不歸咎穆正春而以不遵調度坐保襄樊奏參金國琛以同知降補人人稱冤等語金國琛業經張之萬調營差委該員才具人品諒必知之甚悉其降補之案是否實有貽誤之處抑或真有冤抑並著該撫秉公查訪據實奏聞將此由六百里各

諭令知之○諭平瑞奏統籌全局擬辦開墾屯田一摺另片奏巴里坤兵多糧少請酌量遷移等語已降旨令議政王軍機大臣會同該部議奏矣新疆兵餉歲需銀三百餘萬兩而烏魯木齊所屬地方卽須三分之一近來內地接濟不能周轉兵民困苦勢甚可虞平瑞於到任後體察情形擬將烏魯木齊及古城等處閒荒馬廠一律開墾升科並擬將孳牲馬匹歸併巴里坤牧放飭交該處營員經理俾有名無實之馬政亦歸實用至屯田之地分給屯兵餉需旣無缺乏操防卽可講求所籌各情尙能因時肇畫就地制宜具見該都統實心任事卽著照所議次第辦理惟事體重大必須斟酌盡善實力舉行俾積弊咸除成效可觀方爲不負委任其密陳一摺卽著畱中備覽至馬匹移併牧放將來於隨時調撥有無窒礙並開墾之後應如何升科抵餉追繳馬價裁屯歸伍酌減

兵額並著平瑞妥議章程詳晰具奏另摺奏添設養濟院收養貧民請動用倉糧等語烏魯木齊地方貧民日增喊飢號寒情形可憫著准其動用倉糧以資拯濟所有一切支放章程並著督飭委員妥爲經理務令實惠均霑毋任侵欺剋扣將此諭令知之○諭恩合查奉天開曠地畝酌量開墾○癸卯諭議政王軍機大臣等崇厚奏東匪被剿南奔並恆齡擊賊獲勝譚廷襄奏逆首伏誅及籌辦追剿情形各摺片此次東匪被官軍擊敗紛向館陶一帶逃逸經崇厚馳赴臨清州所屬之下堡寺地方督軍進剿適恆齡一軍由臨清州拔隊擊賊斃賊數十名達爾濟海羣等隊亦斃賊數十名敗匪由西南竄去惟大股尙在曲周地方盤踞恆齡已督兵繞赴曲周西北追躡卽著乘勝進攻毋令該逆得容喘息至賊蹤飄忽靡定崇厚見已折回威縣籌備前營糧餉著飭令余承恩姜

國仲各軍實力追殺兩面夾擊毋稍鬆勁其莘堂等處著譚廷襄督飭保德就見有兵力相機扼截總期步步進逼設法兜剿聚而殲旃李城稔惡已久此次爲部向魁等應得獎賞准俟僧格林沁查驗洵足快人心而申國法部向魁等應得獎賞准俟僧格林沁查驗無誤卽由譚廷襄酌覈辦理其夜襲賊營並跟蹤剿賊出力各員并准其先行存記彙案請獎至敗匪東遁與嶧山漸近勢必勾通教匪及劉雙印等負隅抗拒著譚廷襄督飭德楞額恩錫等軍迅速會剿毋令日久蔓延黃國瑞一軍該前撫擬令先破費縣寶泉固紮營鳳凰山東南以斷教幅勾結要路所籌尙是卽著責令迅籌進剿不得稍有稽延李城已誅而任縛得尙在宿南一帶竄踞並著譚廷襄嚴飭東省員弁趕緊殲擒以除後患知縣李煥辦理降匪貽誤大局屢令該前撫查參何以始終信任輒爲鋪敘戰功

殊屬非是仍著懍遵前旨將該員撤任查辦一面遴選勝任之員
前往接署不得再爲瀆請自干咎戾將此由六百里各諭令知之
○諭都興阿等奏賊撲北岸軍情喫重師船遭風沈溺失去礮位
各摺片前因江浦等處防務喫緊諭令會國藩督飭李世忠實力
防守毋任該逆得以逞志江北茲據都興阿等奏稱賊勢大股北
趨竄陷江浦縣城李世忠何以未派一旅之師迎頭攔截該提督
身膺專閫受恩深重坐視賊勢猖獗絕不援應實屬有心貽誤著
會國藩傳旨嚴行申飭並檄令懍遵前旨將衡陽各隊兵勇調回
防所責令將江浦縣城迅圖克復並嚴防江口不得再令匪蹤偷
渡儻仍前玩泄必將該提督重治其罪江浦旣陷六合可危旣據
該將軍等派令刁經明前往查探卽著相機策應揚防關繫緊要
裏下河一帶尤係完善富庶久爲該逆垂涎都興阿富明阿見在

專顧揚防恐賊眾明攻揚州乘虛分竄裏下河尤不可不防著都興阿等公籌兼顧務令該處有備無患並著吳棠仍遵前旨督飭在防兵勇實力防範毋稍疏忽爲賊所乘致落後著福山船隻遭風礮划沈失著都興阿飭令郭定猷等趕緊修整以利攻剿見在和含等城尙未克復該逆既陷江浦勢必駸駸上犯唐訓方雖赴蒙城會辦善後仍須酌派勁軍遏剿毋令匪勢西趨益致延蔓前日有人奏道員吳坤修治軍嚴整殺賊勇往其弟同知吳敦修曉暢營務善馭士卒該二員見在楚營請飭赴山東剿賊等語吳坤修等平日帶勇能否得力著會國藩酌量情形如該二員人材可用卽令其酌帶平時勇敢將弁親兵迅赴山東歸閭敬銘調遣一面由會國藩迅速具奏皖省江北軍情同時喫緊兵力不敷分布並著會國藩飛咨毛鴻賓催令江忠義迅率所部前赴該大臣軍

營聽候調撥再據都興阿奏前次逃出長髮難民已紛紛回渡靖泰一帶照常安靜等語既係逃出難民何以又復回渡江南行蹤殊屬可疑著都興阿富明阿吳棠派員確切查明如有續來者務須嚴究來歷分別妥辦毋墮奸計將此由六百里各諭令知之○諭前因管帶常勝軍之白齊文不遵調遣將道員楊坊毆傷並搶劫餉銀四萬餘元當將白齊文革去三品頂帶交李鴻章嚴拏按照中國制度辦理茲據總理各國事務衙門奏稱美國公使蒲安臣爲白齊文表功辯誣白齊文潛逃來京該衙門王大臣未經傳見亦未接其摺件英國公使復爲緩頰美國公使亦代爲認罪見飭白齊文仍行回滬聽候李鴻章辦理各等語白齊文劫餉毆官不遵調遣律以中國軍法其罪萬無可逭自應照總理衙門所議由李鴻章酌量辦理見在白齊文赴滬該撫卽欲稍寬其罪必當

使所犯各罪一一認伏然後量爲施恩俾知中國軍律悉由封疆主持總理衙門不能遙制於辦理軍務亦不至有所掣肘也原摺並照會八件均著鈔給閱看再據都興阿等奏總兵郭定猷派赴福山策應適狂風大起各船槓槓皆有損壞聞黃翼升所部各船皆有沈溺各等語前據李鴻章奏稱黃翼升以該處沙灘無可停泊移紮福山上三十里之鹿苑港並未有師船沈溺之事何以都興阿等忽有此語見在潘鼎新等兵到後福山情形如何常昭能否解圍該降眾深明大義必得官軍援救方不阻其反正之忱而他處義民亦可聞風響應所有近日該處軍情卽著迅速具奏將此由六百里諭令知之○諭晏端書等奏通籌高潯兩路軍務請飭江忠義由東省進兵一摺江忠義部曲本在湖南由楚起程計日卽當抵皖勢不能再令回粵而陳金釭占踞信宜負隅已久不

可不急圖殄滅卓興方耀兩軍素稱勁旅必得大員調度則事權歸一呼應較靈著崑壽迅卽前赴高陽督飭卓興等奮力進攻務將陳逆等股匪剋日殲除以副委任晏端書另摺奏新任撫臣抵韶業經交卸撫篆仍回總督署任惟自揣年逾六旬精力不及深懼負荷弗勝等語晏端書見經署理督篆惟當振刷精神遇事力圖整頓斷不可存五日京兆之見稍涉推諉黃贊湯荷朝廷辭出京沿途並無梗阻何以到粵如此之遲實屬不知緩急該撫見在韶州接印卽著星馳晉省毋再耽延黃贊湯荷朝廷知遇之恩膺茲鉅任當感激圖報與該督等共拯時艱儻敢意存玩泄不知振作則是自外生成恐不能長承恩眷也懍之勉之前據羅惇衍奏廣東省賭風最盛劉長佑下車伊始卽將白鴿票花會並闖姓番攤各賭博先行禁絕號令一新百姓亦樂於從命見在該督離任各種

賭博故態復萌請飭晏端書一體嚴禁等語賭博爲害閭閻往往破家蕩產弱者轉於溝壑强者流爲盜賊不可不嚴行查禁著晏端書督飭所屬出示嚴禁以裕民生而端風化將此由六百里各諭令知之○予直隸被戕知府金秉忠祭葬世職山東殉難知州江恭先祭葬世職建祠○甲辰諭內閣耆齡奏紹興府城克復後蕭山踞賊亦同時渡江分竄浙東肅清等語浙江省金衢嚴甯紹台等府屬地方經賊竄擾惟衢州府一城未經失陷其餘各郡邑均爲賊踞年餘以來地方百姓慘遭荼毒節經耆齡左宗棠各督所部由閩境分道進兵將各府州縣次第克復浙東全境已就肅清前據左宗棠奏稱浙東人物彫敝田土荒蕪遺孑殘黎喘息僅屬閱之殊堪哀憫吾民何辜罹此慘酷所有浙東新復各府州縣地方著加恩蠲免二年錢漕以蘇民困該督撫卽刊刻謄黃徧行

曉諭並督飭各地方官吏安集流亡加意撫綏務使吾民均霑實惠母任吏胥弊混用副朝廷軫恤窮黎廩念民艱至意○會國藩奏臣親赴前敵各軍查閱營伍正月二十八日乘舟下駛行過池州大通聞蕪湖金柱關軍情喫緊次日趕至蕪湖周歷城壘旋赴裕溪口適彭玉麟由東西梁山駛赴金柱關晤悉偽侍王連日撲犯該處官軍連次獲勝二月初五日行抵烏江水營與提臣楊岳斌同至金陵之大勝關次日入雨花臺營盤逐段查閱均尙穩固疊據探報忠逆之黨偽愛王黃崇發偽顧王吳如哮等股續渡九洲二十七以後屢撲李世忠部將陳自明營盤至初二夜失陷初三早浦口繼陷該逆遂分撲江浦橋林城壘勢甚猖獗聞將先竄西梁山裕溪口再犯無爲廬州等語又據甯郡各軍稟報廟埠等處之賊分小股逼近郡城劉松山出城迎剿擒斬多名而大股

由敬亭山趨併楊柳鋪圍撲鮑超老營鮑超督率諸將分路出擊大獲全勝旋即收復西河其小淮窯馬家園等處賊壘亦經王可陞率師埽蕩鮑超乘勝進攻又將紅楊樹高嶺梅嶺竹塘仰賢圩麒麟山各壘全行平毀其灣沚一股經水師擊退總計甯郡西南北三面百餘里之賊一律埽除惟水陽鎮金寶圩尙未克復自去秋以來奇險疊生仰託 聖主鴻福轉危爲安臣以南岸局勢較鬆調駐防三山之劉連捷三營北渡無爲州與毛有銘協守石澗埠調駐防塞亭之梁美材三營北渡廬州與石清吉協守郡城會國荃亦撥熊登武等營添紮東西梁山以保要隘惟巢含以上地勢寬曠賊數眾多目前兵力單薄未敢浪戰必俟李續宜銷假回任江忠義由湘東來乃能會剿皖北由巢含迤邐而下至九洑洲以清北岸逆氛至石埭太平之賊於二月初一日竄至夥縣旋即

退出嶺外於潛昌化之賊初三日竄近徽郡唐義訓迎擊獲勝此
兩股意圖內犯江西能否堵截尙無把握臣將金陵戰守事宜商
定卽赴九洑洲相度地勢回舟西上仍往蕪湖裕溪無爲一帶詳
加察看如果巢賊上竄自當兼程回省以固根本要地聞李世忠
親赴五河所有浦口九洑洲失陷情形尙未接其咨報卽甯國徽
州金柱關三處大捷亦未據該軍詳報 上諭議政王軍機大臣
等會國藩於正月起程沿途查看蕪湖金柱關等處營壘二月至
金陵雨花臺營盤逐段查閱均尙穩固惟僞愛王黃崇發等股續
渡九洑洲陷李世忠部將陳自明營盤浦口亦經失守該逆分撲
江浦橋林圖竄西梁裕溪再犯無爲廬州該大臣以南岸局勢較
鬆調劉連捷等營北渡協守石澗埠及廬州等處俟金陵戰守事
宜商定卽赴九洑洲相度地勢回舟西上至蕪湖一帶布置所籌

均尙周妥浦口被陷江浦等處岌岌可危李世忠自應親督兵勇認真防剿何以遠駐五河任令匪蹤竄擾實屬玩誤取巧昨經諭令該大臣傳旨申飭並令調回衡陽各隊將江浦縣城迅圖克復著卽懷遵前旨飭李世忠親赴前敵奮勉圖功儻仍前貽誤卽行據實參奏該大臣赴九洲後著將詳細情形及如何辦理之處趕緊具奏李續宜江忠義均已疊次催令赴皖該大臣卽派弁迎探商酌會剿之策由巢含迪遞而下游一律穩固迅奏膚功用慰殷盼將此由六百里諭令知之○吳棠奏總兵黃國瑞於二月初七日督同副將鄧得勝等分路進攻長城逆匪該逆仍敢死拒黃國瑞嚴飭各隊不准撤回連夜奮攻至三更後攀牆直上該逆仍在牆頭拌死抗拒短兵相接黎明西北風大作官軍施放噴筒火箭圩內草房火起賊勢大亂立斃領隊賊目三名餘匪百

餘名匪勢不支退敗下牆衝出圩門越濠向南橋一帶奔竄張從龍等帶兵追剿陣斬賊目數十名生擒賊首劉兆春蘇政益蘇位馬四四名正法餘匪一千餘名殲戮淨盡並無一名漏網復入圩將潛藏棍匪搜殺無遺黃國瑞卽於二月十三日督隊進紮杜家堡圩參將張從龍等進紮房村圩北路各匪圩懾於先聲紛紛納款臣仍飭黃國瑞整軍而進相機辦理此入東官軍攻克長城賊圩之實在情形也總兵黃開榜一軍於擊退大股援賊後派副將姚廣武等收撫天齊廟童亭謝家灣等圩並攻克邵家花園賊圩斃賊多名生擒賊目李魁元朱佃奎楊丙謝于廣輕四名參將艾憲銀等又生擒賊目任成邢城二名均各正法孫瞳踞賊見官軍繞至西南各圩極爲恟懼黃開榜又將礮船大礮四十位調入礮臺憑高轟擊打倒圩內房屋甚多二月初三日夜盤獲奸細技出

擒首任弗得寄擒首李允信件有欲薙髮逃竄邀李逆率黨來援等語黃開榜卽密派副將姚廣武等馬步各隊每夜在要路埋伏以防潛遁初五日四更擒首任弗得帶匪二百餘人開圩向南路逃竄官軍四面遮擊悉數殲除擒首任弗得受傷就擒初六日黃開榜復令各軍乘勝攻圩賊目任廣海猶復死拒官軍奮勇攻入賊仍巷戰千總楊長林斫斃賊目任廣海餘賊駭散官軍盡力搜殺斃賊無算立將孫瞳賊圩平毀此宿州官軍攻克孫瞳賊圩之實在情形也臣查長城孫瞳逆圩皆係著名賊巢匪首劉兆春任弗得等皆係著名悍擒仰賴 聖主天威各將弁爭先奮勇俾堅圩連克逆首併擒可否邀恩酌獎恭候 聖裁 上諭長城賊圩前已據譚廷襄奏報攻克並將殲除李城首逆續行具奏疊諭該署撫飭令黃國瑞移軍進攻沂沭賊巢見在黃國瑞一軍剿辦得

手鋒勢甚銳著吳棠卽飭該總兵乘此聲威進攻寶泉固賊圩將沂郡巨匪先行翦除卽由鳳凰山東南紮營與西北充軍會合四面夾攻以期速殲巨股毋稍延誤卽家花園及孫瞳賊圩既經攻克宿州一帶情形當已稍鬆著吳棠卽飭黃開榜一軍將宿州未淨各捻股迅速掃除毋畱餘孽將此由六百里諭令知之○諭前據耆齡奏報克復永康武義等縣情形當經諭以賊匪被剿時虞旁竄其江西福建各隘口該督仍應處處兼顧居中策應總以仍駐浦城爲宜本日復據該督奏報浙東肅清皖南喫緊見飭林文察一軍仍駐武義壯紹郡之聲勢固台處之藩籬康國器等率各勇移紮蘭谿以資防剿並擬將來雇募海舶添造戰船循江而下駐紮蕭山一帶進攻杭城南與浙師西南會合以成夾攻之勢分兵規取海甯海鹽聯絡上海官軍圖攻嘉興使賊蘇杭中斷不能

援應等語浙東軍務得手杭城不難乘勢攻復惟逆首譚星一股由於潛昌化竄入皖南必將句結太平石埭諸賊爲患逆首僞王黃呈忠亦由富陽渡江欲與李秀城合勢北犯左宗棠飭令蔣益澧規取杭州而催劉典一軍回嚴以向皖南並飭劉培元等軍會合開化相機截剿及分紮淳遂之衝茲據耆齡所奏亦稱蕭山踞賊渡江已由富陽分水竄往徽州此時皖南及江西之廣饒到處皆虞分竄卽閩浙交界處所亦不可不豫爲之防浙西地方如何規復一時尙難豫定耆齡若移紮蕭山進規杭城則與福建江西皖南相距寫遠設浙西之賊窺伺福建等省必致援救莫及耆齡總宜仍駐浦城嚴扼要隘是爲至要所有閩軍進止機宜隨時與左宗棠會籌妥辦毋稍疏虞將此由六百里諭令知之○以山東攻克長城賊圩擒斬首逆任弗得賞副將鄧得勝遊擊熊朝鑑巴

圖魯名號都司張保聖知縣周士溥花翎餘升敘開復有差○乙
巳諭議政王軍機大臣等前因閻敬銘奏懇賞假營葬於本年春
二月卽馳赴山東署任當以東省軍務緊要諭令趕將葬事辦理
迅卽前往接署撫篆見已將屆暮春該署撫營葬一切計已告竣
且距二月十七日該署撫百日孝滿之期爲時又已歷旬尙未據
報起程見在山東軍務毫無起色兗沂一帶棍教各匪充斥張錫
珠股匪久踞運河以東近又分股回竄直境擾及曲周甯晉等縣
東省勦辦不能得力則運河時虞搶渡畿輔之防日無暇晷譚廷
襄見駐東昌五日京兆更慮呼應不靈辦理殊形棘手閻敬銘務
當仰體朝廷破格奪情之意迅卽馳赴山東東昌府接署撫篆將
軍務事宜妥爲辦理並將起程日期一面馳奏以慰廑系毋稍遲
緩將此由五百里諭令知之○諭都察院奏甘肅貢生道以德等

呈訴回匪馬化澹糾黨焚掠圍攻靈州戕害官兵慘殺百姓提督
定安敗遁入城以致賊勢復張都司鐵秉忠引來馬化澹戚黨馬
承清等聲言馬化澹已在固原投誠該逆等雖假意輸誠仍肆搶
掠其黨納清秦黑文選攻陷平羅之寶豐石嘴山等處河東河西
百十餘堡悉成灰燼若竟許馬化澹投誠必致養癰成患懇恩勦
辦等語前據恩麟奏靈州回匪被勦窮蹙乞降當經傳諭該署督
令其責成定安楊炳銓等查明真偽分別辦理茲據該省貢生道
以德等來京瀝訴如果屬實顯係該提督等任意粉飾實堪痛恨
著熙麟恩麟查明實在情形儘回匪以就撫爲名仍肆焚搶卽應
趕緊痛勦不得遷就貽誤慶昫前奏由草地赴甯夏新任覓在已
否起程著卽馳抵任所將前後情形確查具奏該貢生等以垂暮
之年遠來呈訴自係創劇痛深無門呼籲熙麟恩麟身任地方責

無旁貨務卽督飭定安等認真籌辦如該回民真心悔罪投誠必
應呈繳器械遣散餘黨方屬可信若空言就撫尙恐墮其奸計該
將軍等固不可輕聽該貢生一面之詞概行誅戮亦不可於該貢
生之言漠不加察也原呈著鈔給閱看熊煥章何勝必二員前諭
駱秉章飭令赴甘本日駱秉章奏何勝必見在敘南防剿喫緊未
能到任已飭熊煥章募足勇丁二千名由白馬關取道赴甘該總
兵到後熙麟等察度何路軍情最緊飭令駐紮何處以資得力將
此由六百里諭知慶昫熙麟並傳諭恩麟知之○李鴻章奏准黃
翼升函稱我軍從福山上游五里之西洋港上岸紮營連破賊卡
正月二十一日潘鼎新等各率所部分三路進剿遇賊於同觀山
之北我軍奮力衝突適僞聽王大股來援因賊勢過眾漸不能支
且戰且退是時我軍各營列於福山芳家山等處該逆分兩股來

撲潘鼎新等揮軍接仗賊隊少卻乃聽逆大股由西路回鈔直趨海塘已包鼎字營之後我軍拌死突圍而出撤隊回營黃翼升親督水師由廟後兜截將賊擊退二十三日我軍各營進紮於蘆浦港口之西南跨海塘爲壘營壘未成而賊已出隊一股由東路撲銘樹新營劉銘傳施放炸彈斃賊無數一股乃僞聽王親率悍賊直犯銘樹舊營經遊擊董鳳高開礮擊退遂分犯鼎得兩營牆內槍礮齊施賊猶抵死不退潘鼎新張遇春潛出小隊以洋槍擊斃執旗老賊賊始稍卻我軍併力追過海塘該逆向繆橋田莊一帶退去是日殺賊數百人黃翼升等各帶師船將岸邊之賊殲斃甚多二十五日鼎有得等營亦皆移紮蘆浦港之兩岸二月初四日參將李恆嵩督帶常勝軍千餘名駛抵福山我軍俱拔營進紮與賊壘相去不及半里常勝軍以礮車推往施放將賊壘轟塌丈餘

斃賊不少各營出隊猛撲水師由廟後上岸列隊海塘攻其別壘正在酣戰間常熟城外援賊踵至一股倚賊營爲陳一股攻鼎樹有新營一股分上同觀山塔山窺我後路劉銘傳帶小隊衝上茅家山擊退同觀山之賊張樹珊列隊海塘以防塔山之賊相持至暮賊各回巢我軍亦卽收隊此正月二十一二十四二月初五等日我軍曾攻福山連戰獲勝之情形也臣兩次接到常昭城內帛書據稱正月二十八日該逆以大礮轟倒東門城牆二三丈賊卽乘勢爬城周興隆駱國忠等極力堵住復添來悍賊數千各帶雲梯數百具麇聚西山意欲緣城而上亦經將士開礮抵住其夜該逆在小東門外河下搭造浮橋並於對岸築卡安置大礮轟我城牆次日該逆在大北門外添造四座潛在相近河岸開挖地道聞僞忠王帶賊眾十餘萬由江甯來攻常熟不日卽到情形極爲危

急程學啟等進紫崑太之交相度形勢以蓬南鎮爲賊來往要隘
欲於該鎮添築石城以遏竄路卽督飭各營勇夫備築蓬南石城
分派各營堵禦太倉崑山之賊自帶小隊由蓬南前往太倉進探
地勢忽見逆匪千餘蟻擁而來當卽扼要轟擊未分勝敗復令槍
船依傍旱隊開放槍礮立斃黃衣賊目二名斬獲悍賊數十名生
擒八名被傷落水者不計其數追至太倉西門次日復督各營照
舊興工該逆千餘名船百餘號由六葭濱進竄程學啟調洋槍小
隊並水師船由大通橋至六葭濱揮兵進擊該逆不意我軍之至
卽行奔潰程學啟自督小隊跟蹤追剿擒斬百數十名燒毀賊船
二十餘隻其蓬南石營告成後派知府符信帶兵守之太倉賊股
連日分出東北窺竄亦經李鶴章派隊擊回查常昭縣城雖經降
眾同心固守惟忠聽各股援賊攻圍兩月有餘連營數十里我軍

水陸不過四五千八、竭力攻打寶虞、眾寡不敵、常勝軍自在太倉、敗挫銳氣、未復近復、添買槍礮、軍火剋日馳往福山、協力援剿、未知常昭降眾能否苦守以待之、太倉崑山兩城爲蘇州門戶、賊所必爭、地勢旣難於進、偏兵力亦絀於兼顧、見在忠逆由金陵回竄、兼之金華紹興新復、浙東全境肅清、侍逆亦無駐足之所、數十萬悍賊縱橫蘇杭數百里間、臣軍頗形喫重、兵單地廣、在在堪虞、所望上游新募水陸各營陸續齊到、分路布置、庶可漸圖得手、上諭常昭縣城雖經周興隆等同心固守而忠聽各股援賊圍攻兩月有餘、層層阻隔、聲息難通、城中諸物缺乏、勢難持久、若非迅速救援、恐該降眾亦難苦守、常昭必致復陷、且此次周興隆等若因援絕受害、則以後如有真心反正自拔來歸者、未免中存疑懼、著李鴻章督飭水陸各軍分路進兵、設法救援、務使常昭縣城得以

保全方爲妥善該撫屬英國兵官戈登添派隊伍借買槍礮軍火協勦卽著迅催該兵官趕緊備齊馳赴福山會合進攻以解長城之圍太倉崑山爲蘇州門戶極關緊要見在蓬南石營旣已築成官軍追至崑太城下雖該逆抵死抗拒我軍已有難再撤退之勢著李鴻章督率程學啟等軍步步爲營以圖進取務將戰守事宜妥籌辦理迅拔崑太以通救援常昭之路將此由六百里諭令知之○諭駱秉章奏疊奉寄諭縷悉覆陳一摺並請飭嚴樹森親率各軍馳赴陝南覽奏均悉石逆自敗遁滇境近復勾結滇匪竄及川省之洪縣高縣興文敘永一帶又分股自窪烏司竄撲甯遠川南自甯遠以至綦江數千里間節節須防兵力勢難更議抽調而陝省竄陷興安之匪蔓延於平利輒坪紫陽等處所在與川境毗連仍虞其與洋縣踞匪勾結爲患川北僅有護軍嚮導兩營防勦

總兵周達武一營見駐渠縣爲保甯綏定適中之地上下策應刻難責令越境進剿尙屬實在情形駱秉章以陝南軍務孔亟查有候選員外郎李雲麟見在鄂省擬令帶隊赴川由該督撥添數營赴陝李雲麟前經官文等奏飭令與梁作楫兩軍嚴扼鄖西二竹以防爲剿此時如鄖西一帶防務稍鬆著官文等卽飭該員就近越剿並將梁作楫之軍一同派往以厚兵力三省會剿之事前本以興漢地方緊要諭令嚴樹森帶兵出省馳赴秦鄂交界督辦嗣據官文嚴樹森奏梁作楫一軍而外穆正春等扼紮黃州德安等處嚴樹森並無一兵一將堪以抽調隨征隻身前往無濟於事見尙未能督師援陝所籌諒亦實在情形惟興漢爲川陝楚三省連界誠恐羣醜蔓延剿辦愈形棘手官文駱秉章嚴樹森等均能素顧大局鄂省兵力如有可分仍著隨時妥籌兼顧卽周達武一軍

川省但能騰挪仍著駱秉章飭令赴陝以期得力總之陝省力難自振漢南軍務紛如必得川楚兩省協力相資方冀廓清有日也川南一帶石逆窺伺分竄敘南等處尤爲喫緊著駱秉章督飭臬司劉嶽昭總兵唐友耕等軍實力防剿毋稍疏虞將此由六百里各諭令知之○諭明誼奏行文俄國約期分界妥籌防守並查勘木房等情各摺片前經總理各國事務衙門將議覆西北兩路分界事宜摺件行文知照明誼該將軍於接到行知後卽行札諭厄魯特烏梁海等部落並行文科布多一體照辦所籌甚屬妥協卽著明誼隨時知照塔爾巴哈台一律辦理以期撫綏藩服同心禦侮見據西悉畢爾總督衙門照覆內稱必欲依該國使臣所指常駐卡倫爲界方令分界使臣前來該將軍察度情形仍行給與照會咨行常清令由伊犁就近交俄國領事官轉行西悉畢爾衙門

令該國分界大臣約定地方訂期分路前來會議俟該國照覆到後卽由常清折閱分路知照備辦卽著照所議辦理其所給西悉畢爾衙門照會據定條約剖析詳盡措詞亦頗爲周妥明誼仍當嚴密偵探有備無患毋稍大意庫什業圖地方所蓋木房二間雖據委員拉瑪扎布等查覆係爲巡邏弁兵棲止而設並非俄人所蓋惟恐尙有隱飾著仍飭該委員等詳細查明辦理錫霖見已赴任所有塔爾巴哈台分界事宜卽責令錫霖會同常清明緒辦理將此由五百里諭令知之○予浙江陣亡副將覃聯陞祭葬世職○丙午諭內閣工部錢法堂奏寶源局續辦勦土煎練廢銅該監督等招商督辦獎勵等語此次寶源局續辦勦土煎練廢銅該監督等招商督辦雖屬著有微勞究係分內應辦之事且據援引上屆成案亦僅止於加銜何以不行照辦率請優獎豈以是區區者尙未足贖該局

員等干進之心耶文興係京察未經記名人員乃率請記名以道府用殊屬非是且與新章不符劉名馨係刑部員外郎向來由郎中截取者僅以知府簡用所請俟補郎中後作爲二年期滿截取道府用尤與定例相悖所奏著不准行工部兼錢法堂事務署右侍郎阜保右侍郎吳存義均著傳旨申飭近來各衙門司員往往以辦公爲夤緣保舉之券而各堂官亦惟知以保舉見好屬員相習成風幾至不成政體嗣後各該衙門司員務各知立品自愛勿尙聲華各該堂官亦宜知慎重名器破除情面於屬員賢否覈實舉劾嚴絕干謁奔競之風以作人才而資治理將此通諭在京大小衙門堂司各官知之○僧格林沁國瑞奏臣等欽奉 上諭當於十八日遵旨將逆首張落刑及其子張濤等三犯在軍前極刑處死該逆在潁州府一帶擾害最深隨將張落刑首級解赴該府

地方示眾以儆兇頑而快人心至投誠擒首孫臭卽孫葵汶姜台
凌二犯俱係罪大惡極誠如 聖諭若遽准其免死不足以伸國
法而洩眾憤當將該二犯一併極刑處死傳首示眾以昭炯戒其
餘投誠人等俱係真心向化自拔來歸且能隨營效力自應寬其
既往以廣 聖仁 臣等前因逆首張落刑等雖除尙有擒逆蘇添
幅等未獲遂派翼長全順等帶領馬步官兵在淝河迤北駐紮清
查圍寨搜捕餘匪二月初九日據投誠之王懷義將黑旗擒首蘇
添幅拏解前來當於審明後凌遲處死又阜陽縣劉家寨之劉化
山等呈出擒首劉銀卽劉養才一名宋中元在燕家牌坊拏獲擒
首伊中平一名均卽訊明正法又據遊擊翁吉順在渦河以北王
樓地方擒獲擒首胡四卽胡林彪一名該犯乃山東金鄉縣人從
前捻股竄擾山東該逆屢爲前導實屬罪不容誅已將該犯解赴

山東極刑處死其壘經擒獲零匪並先後擒獲張落刑等之家屬均已正法所有派出之軍見仍駐紫淝河以北清釐各寨督令搜拏餘匪以淨根株其宿州境內已據英翰稟報一律肅清查潁屬太和句有朱圩賊匪未經剿除已經臣等派翼長舒通額帶領馬隊千餘名於二十四日前往相機剿辦見在鹿邑亳宿一帶均無匪圩亦無成股賊匪至汝甯軍務前接張之萬來函商派馬隊助剿原應撥隊前往無如臣等軍營馬隊因上年李城股匪竄赴東境會派營總富和等帶領馬隊千餘會剿昨又因直東股匪鴟張撥副都統恆齡帶領馬隊七百餘名合之前撥海羣馬隊千餘名赴剿其翼長全順等所帶馬隊駐紫淝河北岸一帶清查各圩搜剿餘匪回營尙需時日存營者實在無多尙應辦理稽察見投擒圩及攻剿朱丹股匪臣等再四思維難以再行抽撥當經函商張

之萬如該處可以支持俟調出之隊撤回一軍再行撥往儻待援甚急臣等軍營尙可選拔投誠馬勇千名該勇丁屢次隨同官兵打仗亦尙勇往如須調遣俟接來信卽令副將巴揚阿管帶赴豫以厚兵力臣等刻下趕緊清釐蒙亳交界投誠各圩一俟翼長舒通額將朱圩辦理就緒臣等卽統帶全軍馳回山東兼顧直東以期次第剿除其蒙亳潁宿捻匪初平苗練甫經斂迹善後事宜最關緊要唐訓方馬新貽先後來營臣等與之商辦苗練事宜安插蒙亳善後章程均能悉心商榷緩急台宜若令該署撫在蒙亳宿一帶暫駐則辦理善後可期妥協 上諭安徽捻首張落刑偪脅良民滋擾蒙亳等處會受粵逆僞職罪大惡極不容稍稽顯戮前據僧格林沁於擒獲該匪後奏請解京處死當諭以安徽等處民情痛恨已極卽在該處極刑處死以快人心茲據該大臣奏稱遵

將張落刑及其子張濬兒等三犯在軍前極刑處死並傳首潁州地方洵足以彰國法而洩眾憤其孫臭卽孫葵汶並擒首姜台淩怙惡不悛屢抗官兵見據該大臣等一併極刑處死辦理均屬妥協所有逃逸之擒首蘇添幅劉銀卽劉養才胡四卽胡林彪伊中平四犯均係著名擒首糾眾擾害山東等處地方見在悉經僧格林沁等派兵擒獲一併正法其餘零星股匪均經隨時捕拏並張落刑等逆眷悉行正法鹿邑亳宿蒙城等處已無匪圩地方漸次肅清從此與吾民共享昇平安居樂業著該管督撫慎選牧令薄賦輕徭刪除煩苛與民更始用副廕念殘黎至意○諭議政王軍機大臣等崇厚奏馬步各軍連日在肥鄉雞澤等處截剿竄匪並續有賊匪數千渡河在邱縣一帶游弋張之萬奏東匪竄偏大名河朔邊防告警派兵馳赴臨內一帶防剿各摺片張錫珠股匪先

後由小灘渡河而西行將竄入直境見在賊勢蔓延官軍分投堵截大有應接不暇之勢自應酌度機宜先其所急或將雞澤肥鄉股匪剋期撲滅再行督率大隊兜剿廣平縣前股匪徒著崇厚會商恆齡激勵諸軍相機進剿崇厚見派威縣存城兵勇截剿邱縣竄匪並著嚴飭該員弁實力防剿毋得徒託空言致該匪乘間闖入劉長佑前已由天津啟行計日即可蒞任該督久懸戎行聲威素著著卽馳赴軍營將見在馬步各軍申明紀律認真策勵俾將士人人奮勉痛殲醜類廓清畿輔以副委任直省剿辦股匪得手勢必向東南竄遁豫疆東境正宜厚集兵力遏截賊蹤據張之萬奏匪蹤已渡河逼近大名楊長春駐防龍王廟隘口之軍已落賊後張之萬見派遊擊徐連陞等分帶馬步各勇赴臨漳內黃一帶會同楊長春等兩軍及各該地方團練扼要駐紮著卽嚴飭河北

道周煦徵妥爲調度如該匪竄近邊境卽迎頭截擊力保完善之區毋得稍有疏虞致干重咎上年十二月初五日會諭張之萬查明河北鎮牛浩然能否得力尙未據該撫覆奏實屬遲延本日該撫摺內有歸周煦徵調度之語其牛浩然見在會否帶兵亦未之及該鎮究竟能否得力著仍遵前旨速奏山東股匪屢次西竄該省竟不能派一旅之師豫先攔截以致貽患畿疆殊屬可惡此後如該匪被勦回竄譚廷襄務當嚴檄各營會同直省官軍合力兜勦絕其歸路方可聚而殲旃永除後患儻該員弁堵勦不力任令該匪來往自如必當重治其罪不稍寬貸將此由六百里各諭令知之○僧格林沁唐訓方奏臣唐訓方自接署安徽撫篆駐紮臨淮默會臣僧格林沁撫苗之意札令帶練速抵渦南設法擒獲逆首張落刑立功苗沛霖遂卽帶練進紮蒙城其意未嘗不思立功

選獎嗣知張落刑業經英翰拾獲頓失所望舉止失措臣等因逆
首就擒札令苗沛霖將練歸農並令伊來營面議安撫一切苗沛
霖稟覆支吾意在緩期本月十八日臣唐訓方路經蒙城苗沛霖
親迎數里有欲散練歸農各處釐卡歸官之意臣等卽諭作速辦
理以昭體恤查苗沛霖數年桀驁其過不可勝言況此等心迹斷
難望其自行向善然或勦或撫必應謀定後動方臻妥帖臣等連
日籌商勦之一層查苗沛霖素居下蔡巢近壽州臣僧格林沁自
量兵力尙可勦辦惟淮河以北地勢閒有溝渠馬隊或可馳驅礮
車可以勉強挽運一經進勦苗沛霖勢若不敵必將南竄淮河以
南地多稻田縱橫溝壑馬隊礮位斷難行走彼時專恃臣唐訓方
所統各軍接手勦辦臣唐訓方各路兵勇見值粵逆過江擾及巢
縣賊眾兵單處處堪虞儻苗練南竄我軍腹背受敵兵力斷難兼

願且苗練不竄淮南必竄清淮吳棠一軍防堵下河尙在支持儻後路有警更難著手況近日山東畿南賊勢日張必須添兵助剿臣僧格林沁等回顧之舉亦屬迫不可待是剿辦一節此時勢難輕動自可權用安撫之計一俟南北兩路官軍無後路之憂兵力足可制其死命斯時苗沛霖如果練眾不散釐卡不交不難合力剿除此刻下勢難攻剿之情形也爲今之計即可借苗沛霖自欲撤練歸農釐卡歸官之勢並暫事羈縻以減釐金輕賦稅不准團長任意苛斂剝削出示曉諭苗沛霖如果遵行其勢自孤如不遵行其練必將歸怨然後待時而動庶幾計出萬全 上諭僧格林沁等奏督軍清查寨圩及密籌駕馭苗練各一摺辦理均屬周妥鹿邑毫宿一帶已無匪圩亦無成股賊黨該大臣見飭派出之軍駐紮淝河以北清釐各寨搜捕餘匪自應趁此聲威淨絕根株惟

張錫珠股匪又復分股竄入直境經恆齡等分投追剿而賊勢過重恆齡所統馬隊猶形單薄不能制其死命總督劉長佑雖已到直既無親兵同來而人地又不免生疏恐難責效於旦夕該大臣提得勝之師剋期回東相機進剿聲威所播自收事半功倍之效唐訓方既得民心則蒙毫善後事宜即可交該署撫辦理諒可悉臻妥協著僧格林沁於接奉此旨後將該處應辦事宜移交唐訓方籌辦卽行帶兵北上先剿除張錫珠各股匪以清畿輔門戶其汝甯捻匪如必須撥兵往剿並著該大臣酌量情形或挑選投誠馬勇千名前往援助以資協剿苗沛霖自聞張落刑被擒後驚慌失措原不難於剿辦第苗沛霖既面稟願散練歸農釐卡歸官自可趁此解散消患無形該大臣等所出示諭甚屬周妥洵爲良策卽著照所議辦理督飭各圩散歸農畝從此輕徭薄賦生聚招集

庶吾民得以休息各安生業如有不遵諭示藉團苛斂者卽從嚴懲辦並著唐訓方督同馬新貽慎選牧令勸課農桑興起學校以期共享昇平之福毋令稍有滋擾德楞額旣查無逗畱情事卽著毋庸置議昨據譚廷襄奏長城孫疇等圩均已攻破李城已爲宿州人卽向魁卽貴等所殺其首級見經解送該大臣軍營卽向魁等云卽係該大臣諭令黃開榜所募者亦一快事也將此由六百里各諭令知之○諭韓超奏官軍剿辦思南等處賊匪情形並貞豐回匪竄陷歸化廳城旋卽收復各一摺思郡河東鳳凰山大小聖等處爲匪徒巢穴必須迅速掃蕩方能節節進剿著韓超飭記名總兵金大文等督率各軍奮力攻剿盡殲醜類其河西匪黨復糾眾攻撲塘頭等處以圖牽掣我師卽江並有分股竄擾該署撫見調騰越鎮總兵劉義方帶隊赴援著卽嚴飭該總兵會同各路

兵勇實力捍禦毋致該匪紛竄其貞豐之賊分三路竄擾歸化鄧
岱永甯均形喫緊雖歸化失而旋復而興郡尙未攻克賊勢仍未
少衰著飭總兵趙德昌等軍會同各地方官痛加勦洗恢復興郡
各城毋再貽誤致干重咎至歸化通判束燦南失陷城池本有應
得之咎據奏該員調團克復素得民心卽著照所請革職暫畱署
任辦理善後防勦事宜將此由六百里諭令知之○河南巡撫張
之萬奏蘭儀儀睢甯商虞曹考五河廳業經裁撤應將所屬十
一汛州判縣丞主簿巡檢等員缺一併裁撤以昭畫一如所請行
○張之萬奏已革總兵張曜等攻破荒坡曹窰等寨後臣復飭接
攻商蘭店賊圩該寨不能抵禦老幼男婦環跪乞降知州汪鼎和
等帶隊衝入擒首閻丁爬陶海樓等竟敢糾黨抗拒均卽生擒訊
明正法十八日移營進攻馬姜寨路閻莊等處賊寨我兵聲威旣

振該寨先後來營乞降張曜以著名巨擒未誅深恐勾結爲患十
九日督兵將路閭莊匪首吳玉江魏元林王盡臣嚴連中董驢等
悉數擒獲訊明正法惟擒首吳萃亭等被商店寨內奸人勾結率
眾竄入查商店爲項城迤北完善之區必須趕緊追剿以免日久
爲患當飭張曜等督率兵勇前往勦辦毋任滋蔓報聞○以擒獲
安徽擒首功賞台吉克興額諾林丕勒雙眼花翎章京那木薩賚
扎布公銜○予貴州殉難知縣鶴年陣亡總兵官吳宏盛等祭葬
世職○是月豁免四川青神縣被擾咸豐十一年暨同治元年額
賦蠲緩直隸安州等三州縣歉收江蘇高郵等二十八州廳縣暨
淮安等四衛被災被擾並山東嶧縣等十縣被災被擾新舊額賦
暨倉漕銀兩展緩山西臨汾縣歉收咸豐十年上忙額賦